

# KA HISTORI KA RI KHASI-JAIN̄TIA

J. E. Tariang, Ex-M.P.



Ki Sngi Barim u Hyn̄niew Trep  
*"Jingshai ngi wad sawdong pyrthei*  
*Jingshai ka ri ngim tip ei ei,*  
*Kumno hyndai ki kni ka kpa*  
*Ki sam pyrthei, ki seng hima*  
*Mynba baroh u I Iynniew skum*  
*U sah kyrpang - hapoh badum."*

-- Soso Tham

2005




# KA HISTORI KA RI KHASI-JAIÑTIA

*da*

*U. J. E. Tariang, Ex - M.P.*

2005



*La Lum Jingtup - da u Nongthoh*

*Ki Hok Longtrai la tyngkai*

*Ki Dur - da u Ahmed Hussain*

*Ka Sien Shon kaba nyngkong. (2005)*

**Ka Dor : 75 Tyngka**

*Published by Mrs. B.W.Tariang  
& Printed at Kamala Art Press, Shillong-793002*

## Contents

Foreword .....	v
<i>Preface</i> .....	<i>vii</i>
Ka Tienlamphrang .....	1
Ka Thymmei Ka Jaitbynriew Khasi .....	2
Ki Hima Khasi – Jaiñtia Ha Shuwa Ka Jinglailtuid .....	14
Ka Hima Jaiñtia .....	14
Ka Hima Jaiñtia Hapoh Ka Jingsynshar Phareng .....	15
Ka Jingsynshar Hapoh U Raja Rajundar Sing .....	17
Ka Hima Shyllong .....	21
Kiwei Pat Ki Hima Khasi .....	26
Ka Synshar Khadar Bad Ka Bishar Ki Dorbar Hima Hapoh Ka Jingsynshar Phareng.....	26
Ki Jingkylla Ha Ka Synshar Khadar Hapoh Ka Jingsynshar Ki Phareng .....	27
Ka Jingaleh laitluid ka ri India .....	29
Ka Jingsdang Jong Ka United Khasi – Jaiñtia Hills Autonomous District Council (1952-1957) .....	30
Ka Jingsdang Synshar Ka District Council Ha Ri Khasi – Jaiñtia .....	31
Ka Relief Programme Na Ka Bynta Ki Thaiñ Ri War .....	38
Ka Development Programme .....	39
Ki Election (1957) .....	40
Ki Dorbar Hima Khasi Hadien Ka Jinglailtuid Ka Ri India .....	41
Kumno Ki Khasi State Ki Hap Hapoh Ka Ri India .....	42
Ki Hima Khasi Hapoh Ka Jingsynshar Ka District Council .....	44

Ka Rukom Jied Ia Ki Nongsynshar .....	46
Ka Jinglut Jingsep Ki Hima Ha Ka Synshar – Khadar .....	47
Ki Daw Jong Ka Jingiakhiih Paidbah .....	48
Ka Hok Halor Ka Khyndew Ka Shyiap Bad Ki Dustur Ki Riti .....	51
Ka Jingdawa Ban Ai Ka Jingsynshar Lade Ha Ki Hima Khasi .....	53
Ka Dur Synshar Paibah Ki Hima Khasi .....	53
Ki Map .....	54
Ki Dur .....	57
Ki Jingkylla Synshar Kiba Ktah ia ka ri Khasi-Jaiñtia .....	60
Ka Jaiñtia Hills Autonomous District Council .....	62

## Foreword

Nga sngewkmen shibun ba u Bah. J.E. Tariang u la lah ban lum ia shibun ki jingtip jong ki jingjia bad ki jyngkylla ha ki kam sain hima-sima jong ka Ri Khasi-Jaintia, da kaba kynthoh kyrpang ia ki artylli ki hima kiba heh duh ha ka Ri Khasi, kata, ia ki Hima Jaiñtia bad Shillong.


Kane ka kot ha kaba u nongthoh u la kham iathuh bniah ia ki jingkylla synshar khamtam eh ha ka por synshar ki Phareng bad hadien ka jinglailtuid ka Ri-India, kumno ka saiñ hima-sima ka la long ha ka Ri ha ka por synshar Phareng bad hadien kata.

Ki jingtip ba la kynthup ha kane ka kot ki long kiba donkam ba ki dei ban tip paitbah, khamtam ki khynnah skul bad ki samla pule.

Khlem artatien kane ka jingpyrshang jong u ne u rangbah kan khring ia ki nongthoh kot bad ki Scholar ban nang wad bniah ia ki bynta bapher bapher jong ka jaidbynriew.

Ngi ai khublei ia u nongthoh u ba la trei shitom ban pynmih ia kane ka history, bad nga kyrmen skhem, ba un dang lah ban

nang noh synñiang shuh shuh na ka bor  
jingtip jongu na ka bynta ka jingmyntoi ki  
nongpule.

A handwritten signature in black ink, appearing to be 'F. Lyngdoh', written above a horizontal line. Below the line, the date '13/5/03' is written.

**F. Lyngdoh**

*Minister*

*Urban Affairs & Municipal*

*Administration, Housing,*

*Fisheries and District Council Affairs.*



## Preface

Wat lada la don ki Nongthoh kiba la pynmih ia ki katto katne ki bynta kiba iadei bad ki dustur ki riti shaphang ki syiem Khasi Synteng bad kiwei, ym pat shym la don satia ka kot histori shaphang ka ri Khasi Jaintia.


Nga sngew kmen ban iohi ia kane ka kot kaba la ai lyngkot ia ki katto katne ki bynta ba kongsan jong ka histori ba la thoh da I Rangbah J.E.Tariang uba long ruh uwei na ki 'riewtymmen. Kane ka kot ka ktah ruh khamtam eh ia ka histori shuwa bad hadien ka jinglaitluid ka Ri India. I la ai ruh ia ka histori lyngkot jong ka Hima Jaiñtia bad Shyllong ha shuwa bad ha ka por ka jingwan hiar thma ki Phareng.

Kane ka kot ka long ka jingprat bad mait lynti ha kaba nga ngeit kiwei ki scholar jong ka ri kin sa nang wad bniah bad pynmih ki kot histori kiba lah ban ai jingtip khamtam ia ki samla bad khynnah pule ba kin tip shaphang ka thymmei long-briew jong kane ka ri kaba ngi tip mynta kum ka bri u Hynñiewtrep.

Nga ngeit skhem ruh ba kane ka kot kan iarap ia u paid Khynriam Pnar ban tip ia katei ka juk ba la kdew haneng shaphang

ki jingkylla ka saiñ hima ha kane ka ri  
baieit jong ngi bad kumjuh ruh ba kane ka  
kot histori kan nang ktik ia kiwei ban bud  
dien bad pynmih ia ka histori kaba pura  
jong ka ri Khasi-Jaiñtia.

Sa shisien pat, nga ai khublei ia utei u  
rangbah uba ha ka jinglong tymmen, u la  
lah ban pynmih ia kane ka kot histori.



**Ibaphimon Manih**

*Principal*

*Bormanik College, Upper Shillong*

# Ka Histori Ka Ri Khasi-Jaiñtia

## *Ka 'Tienlamphrang*

Ka Map jong ka ri Khasi-Jaiñtia ha shuwa ka jingsynshar u Phareng ka kynthup ia ki them ka Brahma shaphang shatei, ki pyntha ka Sarma shaphang shathie, ka Cachar Hills bad Naogong District shaphang Mihngi bad ka Garo Hills shaphang Sepngi.

Ia kane ka ri la phiah hapdeng ka jingsynshar ki bun tylli ki Hima Syiem kynthup ia ka Hima-Jaiñtia bad Hima Shyllong, kiba kham heh duh hapdeng jong ki.

Ha ka snem 1833 hadien ka jingiakren iasuk hapdeng u Syiem Tirot Sing bad ka Sorkar Bilat, ia ki Hima ha ki lum Khasi la pynwan hapoh ka jingsynshar ka ri Bilat lyngba u nongmihkhmat ki Syiem Bilat (Crown Representative). Une u la thung ia U Lat ka Assam kum u Agent jong u bad utei u Lat pat u la pyniaid ia ka jingsynshar lyngba u Political Agent. Ha kata ka por la phiah synshar ia ka ri Khasi-Jaiñtia ha ki ar-bynta. Kawei ka bynta ka kynthup ia ki Hima Khasi ia kiba la shah ban bat katto katne ka bor synshar ha lade hapoh ka

jingpeit u Political Agent kum ki Semi-Independent State. La weng ia ka jingsynshar Syiem ha ka Hima Jaiñtia ha ka snem 1835 bad la pyniasoh ia ki katto katne tylli ki bynta jong kiwei pat ki Hima Syiem ba la knieh da ka Sorkar Bilat ia kiba la tip kum ki Ilaka Sorkar. Ia kine la pynhap beit hapoh jong ka jingsynshar ka jylla Assam, lyngba u Deputy Commissioner ryngkat ruh ia ka Hima Jaiñtia ia kaba la tip kum ka Civil District jong ka Khasi-Jaiñtia Hills. Kane ka Civil District kaba kynthup ruh ia ki lai tylli ki Municipal Ward jong ka Shillong Municipality, ka hap beit hapoh ka jingsynshar kyllum jong ka Sorkar Assam ha kata ka por. Kine ki Ward ki long ka Police Bazar, ka Jail Road bad ka European Ward ba la khot ki Normal Areas jong ka nongbah Shillong.

### ***Ka Thymmei Ka Jaitbynriew Khasi***

Ka tynrai ka jaitbynriew Khasi ka dang sah ha u lyoh badum haduh mynta-mynne. Baroh ki jinglum jingtip shaphang katei ka tynrai long-briew u Khasi ki dang sah tang ha ka jingmaian bad ka jingantad.

Kane namar kata ka dei ka bynta ha kaba donkam ia ka jingwad bniah bad tih thai jong ki 'riewshemphang ban lap dien ia ka jingshisha nangno ka jaitbynriew ka mih bad ha kano ka rukom ka long ka trai halor kine ki lum baieid jong ngi. Don napdeng ki longshuwa kiba la pynsngew lyngba ki khana puriskam ba ki kmierad ki iathuh khana

ha la ki khun ki ksiew pateng pakit shaphang ki Lum Makashang bad ki Hima-Syiem Hima-Patsha kiba iasyriem bad ki jingsynshar hyndai kulong ha ka ri Asia pdeng ne Mongolia. Don pat kiba ngeit ba ka jaitbynriew Khasi ka mih na ki jylla Chan, ka bynta ba shaphang shathie jong ka China.

Ki Khasi ki long ka jaitbynriew kaba kham shong pher napdeng ki para jaid riwlum kane ka thain shatei lam-mihngi ka ri India. Kane ka ri ka don halor ki lum kiba itynnad bad kiba dap kyrhai ka spah mei ramew kiba phiah ia ki pyntha baiar ka them Brahmaputra bad Sarma. Kine ki lum ki don ki madan bad ki them kiba itynnad kiba don kumba 3,000 haduh 5,000 ka jingjong na ka sla duriaw. Ki don ki wah kiba tuid sha ki them Brahma bad Sarma bad ruh sha ka ri Bangladesh. Ki don ki kshaid banoh rymphum kiba pynitynnad shuh shuh ia kane ka ri ba la kyrkhu da u Blei.

Don kiba pyrkhath bad ai jingmut shaphang ka tynrai longbriew bad ka jingwan buhai shnong ki Khasi ha kine ki lum. Ki pynsgew ba ki Khasi ki iasyriem ha ka rukom im bad kiwei ki jaitbynriew riwlum bad kiwei ki para bynriew kum ki Gurkha bad Bhutiya. Ki jingwad bniah shaphang ka jaitbynriew Khasi da ki riwstad riwshemphang (researchers) ka pynshisha ba ka don ka jingiadei kaba iajan shibun eh hapteng jong ki bad kiwei pat ki jaitbynriew kiba shong basah mynta ha Cambodia bad Vietnam bad ruh ha ki bynta ka ri Thailand bad Burma bad ki dewlynnong ka Archipelago. U Dr. R.C. Majumdar, U Dr H.C. Roy Chaudhuri bad

U Dr. K. Dutta ki iathuh ba uwei u skolar German, u Schmidt ha ka 'Advanced History of India, 1948' u la thoh ba ki ktien Mundas bad Khasi ki dei na kajuh ka tynrai ba la tip kum ka Austric, ha kaba ki don ki jaitbynriew ha Indo-China bad Indonesia kiba ka ktien ka thylliej ka mih na katei kajuh ka tynrai. Katkum katei ka jingpyrkhat jong u, kitei ki jaitbynriew kiba shong basah ha ri India ki mih bad krih shaphang mihngi bad shathie lam mihngi bad ki poi nyngkong sha baroh ki bynta jong ka Indo-Chinese Peninsula bad ki poi shaduh ki dewlynnong jong ka duriaw bah Pacific haduh ki tduh jong ka. U Dr. Majumdar bad kiwei ki iathuh shuh shuh ba u Schmidt u ngeit ba kawei pat ka kynhun jong katei ka jaitbynriew ka mih na India bad iaid lynti shaphang shathie da kaba ktah tang ia ki tduh jong ka duriaw bah Pacific bad imat ki iaid na New Guinea sha ka Australia Continent. Lada ka long kumta, ki Khasi kum ka jaitbynriew ki la shang kylleng bad jngai.

Katkum kiwei pat ki jingwad jingtip (researches) kiba kham iadei bad ka rukom pyrkhat pyrdain ki nongwad jingtip kiba hadien habud, kine ki jaitbynriew Khasi ki leit buhai shnong shaphang mihngi lyngba ka Burma, Thailand bad Cambodia. La ong ba ka kynhun kaba rit jong katei ka jaitbynriew ka jied ban sah bad skud ia kine ki lum baitynnad bad ba jyrngam. Kane ka ri ba ki Khasi ki la skud bad long trai ka ieng rasong hapteng ki them jong ka Brahmaputra bad Sarma kaba ka jingheh kane ka ri ka long kumba 6,000 hajar square

mile. La ker kut ia ka shaphang shatei da ka District Kamrup, shaphang mihngi da ka Karbi - Anglong bad North-Cachar Hills, shaphang shathie da ka District Cachar bad Bangladesh bad shaphang sepngi da ka Garo Hills. Ki bynta kiba shathie bad hapdeng jong ka ri Khasi-Jaiñtia ki kynthup ia ki lum kiba madan baiar (table lands) ha ka jingjrong kaba hapdeng 4,000 bad 6,000 phut tam na ka sla duriaw. U kynjang bajrong tam u dei u Lum Shillong uba ka jingjrong jong u ka kot haduh 6,500 phut na ka sla duriaw.

Ki briew kiba shong ha ri thor sawdong ia kane ka ri Khasi-Jaintia kiba iohi ia kine ki lum kiba jyrngam bad tap da ki khlaw ki btap bad u phlang bajyrngam ki sin ia ki trai-ri riawlum kum ki briew kiba shong ha ki jaka phlang (Ghas Land). thaiñ, Haba ka Hima Mughul ka wan hiar thma ha kine ki la tip ia kane ka jaitbynriew kum ki 'Khasia'. Ia kane ka kyrteng la pyndonkam ruh da ki Phareng. Ia kane ka kyrteng la pdiang hi ruh da kane ka jaitbynriew kiba khot ialade ki 'Khasi'.

Ki khana pateng bad ki puriskam shaphang ka jaitbynriew Khasi ki dang iai sah umdum hapoh u lyoh barben. Baroh ki jingpyrshang ban ioh jingshai shaphang ka tynrai long briew bad ka jingiaid lynti ban poi sha kine ki lum bapyngngad ki dang iai sah tang ha ka lyngngoh. Ka khana pateng shaphang ka thoh ka tar u Khasi ka long ba ia ki kot ki sla la shah kit noh ha ki lat-lat jong ka wah bah ha ka por ba ki jngi ban poi sha shiliang ryngkew ha ka jingiaid lynti jong ki ban wan poi sha kine ki thain bad ki lum ba ngi don mynta.

Kawei pat ka jingngeit ki Khasi hyndai ka long ba ka tynrai u Khun Khasi ka mih na ka kynhun ki 'Khadhynriew ling' ha bneng kiba iahiar iakiew lyngba ka jingkieng ksiar ban wan rep wan riang ha sla pyrthei. La ong ba katba ki 'Hynniew Trep' ki dang sah ha khyndew, la pyndkut noh ia katei ka jingkieng ksiar bad kumta ki khun u Hynniew Trep ki iai sah ha kine ki lum Khasi-Jaintia katba ki Khyndai Skum ki sah ha bneng. La ong ba kine ki Hynñiewtrep ki la pra kylleng na u Lum Sohpetbneng uba ki buhai shnong nyngkong eh.

Lyngba ka jingwad jaka ban pynlong ia ka hima, u paid Hynñiewtrep ba la roi u la jied ia ka phang mihngi ban seng ia la ka jong ka Hima ka ban teh song bad synshar ia la u khun u hajar. Kane, la ong, ka long ha ki bynta ba ngi tip mynta kum ka ri lum Jaiñtia bad katkum ki khana pateng, la ong, ba ka hima kaba khatduh ka long ka Hima Madur-Maskut kaba ka nongbah jong ka ka long hapdeng ki jaka lum ba madan ba ngi tip mynta ka Thadlaskein haduh Ummulong.

Hadien, ka jingpait jingpra kane ka Hima, la ong, ba la mih artylli ki hima, kawei ka hima ba synshar ki Syiem Sutnga ha ka nongbah Nartiang ba ngi tip mynta kum ka Hima Jaiñtia bad kawei pat ka kynhun kaba la kynriah shaphang sepngi, ka la seng ia la ka jong ka It ka Hima ia kaba la tip kum ka Hima Shyllong

Hadien, katei ka Hima ki syiem Sutnga ka la kynriah nongbah na Nartiang sha Jaiñtiapur. Baroh ki ri sawdong jong ka ki la tip ia kane ka hima kum



ka Hima Jaintia bad ia kane la pdiang da u paid  
traí shnong katei ka Hima.

Ka Hima Shyllong baseisoh ka la nang iar bad  
pra ha kaba la mih bun tylli ki hima barit bad baheh  
kiba seng la ki jong ki hima barit bad baheh bad ki  
iateh song lang tang ha ki por ba ka ri bad ka  
jaitbynriew ki hap ban ialeh thma ban iada ia baroh  
u pud sawdong ka ri bad ka jaitbynriew.

Ha kaba kynthoh shaphang ki Khasi, U Mr.  
E.A.C. Gait ha ka snem 1909, u la thoh, "Na ki  
nongrim ba la wad bniah, lah ban sngewthuh ba  
kane ka jaitbynriew (Khasi bad Synteng) ka la buhai  
shnong bad shongduh ha kine ki lum da ki bun-bun  
spah snem bad na ka daw ka jingim kyrpang ha ki  
lum bah baiar, khyndiat eh lah ban ioh jingtip  
shaphang ka jingsdang ka long-briew man-briew jong  
ki. Ka ktien ka thylliej jong ki ka iapher bak-ly-bak  
na baroh kiwei pat ki jaitbynriew riwlum kiba don  
ha kylleng ka jylla Assam, hynrei ka pynshisha ba  
ka ktien Khasi ka iasyriem shikatdei eh bad ka ktien  
Mon-Khmer ia kaba la kren da ki bun ki kynhun  
bynriew kiba shong ba sah mynta ha Anam  
(Thailand) bad Cambodia".

Ka hok long traí halor ka khyndew ka shyiap  
jong ki Khasi ka long kaba iadon hok lang lajan ha  
baroh ki jaka jong ka ri, bad ia kane la tip kum ka  
Ri-Raid. Ka jingkylla dur ha ka hok bad long traí  
halor ka khyndew ka shyiap ka la kylla dur tang  
naduh ba ka ri ka hap hapoh ka jingsynshar u  
Phiareng ha kaba la mih ki Ri-Kur, Ri-Kynti bad  
kiwei.

Ki Khasi ki long ka jaitbynriew kiba don la ki kur ki kha kiba don ruh ki jingiadei ba kyrpang ha ka kur ka jait bad ka kha ka man. Hyndai hynthai ka don ka jingngeit ba ka jaitbynriew Khasi ka mih tang na kawei ka tynrai longing jong 'U Thawlang' bad 'Ka Iawbei'. Kawei pa kawei ka long iing ne ka long kur ki don la ki rukom leh niam hynrei baroh na ki ki thang ia ki nongiap bad lum khyndiat u dpei bad hadien ba ki la duwai phirat, ki sa leit buh ia utei u dpei ba la song ha u maw kynthai bad shynrang la ka jong ka jong ia uba la tip kum ki Maw-Shyiang jong kawei ka kur. Ki Khasi ki ngeit ba ka mynsiem jong ki nongiap ka leit poi sha kawei pat ka pyrthei hadien ka jingdkut mynsiem. Ki ngeit ba ki mynsiem jong ki nongiap khamtam ki kmie ki kpa, ki kni ki kha kiba la iap ki lah ban iasaid hakhamat U Blei Nongthaw Nongbuh na ka bynta ki pop bad ki ryngkang jong ki ban ioh ia ka jingmap jong U Blei Trai Kynrad. Ki Khasi ki knia ki khriam lyngba ka shat pylleng bad ka snam jong u syiar ne u blang ba la knia na ka bynta ban ioh ia ka jingmap na U blei ia ki ryngkang ki palat jong ka long iing long sem ne ka kur ka jait. Ki ngeit tang ha uwei U Blei u bym lah ban iohi da ka khmat briew bad uba don bor baroh ban beh ia u ksuid u khrei uba iai ialeh ban pynshitom ia ki.

Ki Khasi ki ju mlien ban thung ia ki mawbynna khamtam ha ki lum jingtep bad ki lynti iaid briew paitbah. Kine ki mawbynna ki don arjait, ki maw-kynthai kiba shu tap ne tynrong hajrong ka khyndew bad ki mawshynrang kiba ieng beit. Ki Khasi ki bat

ia ka long jait long kur na ka liang jong ki kynthei bad kiba kham bun na ki hima ki dang iai bat ia ka hok ha ka liang ka hiar bad ioh pateng tang na ki khun kynthei bad don ruh ki hima ha kaba ia ka hok hiar pateng ioh pateng la pyniabynta hapdeng ki khun kynthei bad khun shynrang..

Ka ri Khasi ka don bun tylli ki hima kiba don la u pud u sam, ki Dorbar Shnong, ki Dorbar Raid, ki Dorbar Syiem bad Dorbar Hima kiba dang sah haduh mynta mynne hadien kiba bun ki jingkylla synshar na kawei ka por sha kawei pat. Ki Khasi ki long ka jaitbynriew kaba bat ia ka synshar paithbah balaitluid bad ka jingim kaba don la ka akor ka burom kyrpang. Hynrei ki long kiba bat skhem ia la ki jong ki hok bad ki dustur ki riti ha ka liang ka imlang ka sahlang kum ka jaitbynriew.

Ka jaitbynriew Khasi ka don bun ki ktien kren (dialects) kiba ki kren ha la ki jong ki jong ki bynta ba iapher jong ka ri kum ha ki dong sepngi, ka Ri-Bhoi, ki lum Jaiñtia, ki War-Khasi ki War-Jaintia, pynban baroh na ki ki kren ia kajuh ka ktien ba la ithuh ha ka thoh ka tar bad ka pule ka dangle. Kane ka ktien Khasi ka long kaba iasyriem bad mih tynrai na ka ktien Mon-Khmer kaba la shem ha Cambodia, Thailand bad ha kiwei ki ri kiba don shaphang shathie ba la tip kum ka South-East Asia. Ia kane ka jingshisha la lap bad pynthikna da ki skolar na ri India bad kiwei ki ri jong ka pyrthei.

Ia ka ktien Khasi ba ngi kren bad thoh mynta la pynmih ha ki jingthoh jingtar bad ka pule ka puthi da ki Welsh Calvinistic Missionary ha ki dak Roman

ha kaba sdang jong ka spah snem kaba khatkhyndai. Ki la leh ia kane ha Saitsohpen (Sohra) kaba long ha kata ka por, ka nongbah jong ka Sorkar Phareng kaba dei peit bad synshar ia ka thain shatei lam mihngi jong ka ri India.

Ki Khasi ki long ka jaitbynriew kaba bat iala ka kular bad ia ka akor ka burom long briew man briew, hynrei ka bym aili ia ka jingpyrshang ban thombor da kiwei pat ki jaitbynriew.

Ki Phareng ki shem ba ki Khasi hyndai ki long kiba kham shai bad shemphang haba ki ianujor bad kiwei pat ki kynhun riwulum ka thain shatei lam-mihngi. Ki pynpaw ba ki Khasi ki la nang lypa ban im kum ki briew kiba la shai ha ka liang ka imlang ka sahlang bad ka rukom bam ka rukom di. Ia kane ki la shem khamtam eh ha ka por ka thma iada ri pyrshah ia ka jingwan hiar thma ki Phareng. Ki Khasi ki bat skhem ia la ki hok ki riti long briew man briew kum ka jaitbynriew bakyrpang, ki long kiba don ka mynsiem ba laitluid bad ki bym aili ia kano kano ka jingpyrshang ki bor nongwei ban synshar halor jong ki. Kane ka rukom im ki Khasi ka long na ka jinglong trai ha baroh ki bynta synshar jong ki hima bad ka ri namarba uwei pa uwei u briew u don la ka hok laitluid ba la seng nongrim naduh mynbarim bajah.

Ki Phareng ki la buh ha ki kynthup jingthoh jong ki shaphang ka jingiasyriem ki ri lum Khasi-Jaiñtia bad ka ri Bilat khamtam ha ka jinglong ka suiñ bneng bad ki lyer batemon batesi kiba beh pyngngad halor kine ki lum. Ki sin ia ka Shillong ba

ka long ka ri Scotland mihngi (Scotland of the East). Ki lum Khasi-Jaiñtia ki long kiba jur slap bad ka Sohra ka long ka shnong kaba jur slap eh ha ka pyrthei baroh kawei. U Phareng u shem ba ka aiom Synrai ka long kaba itynnad, namarba hadien ka lyiur bad jingduna u slap, kitei ki lum ki kup ia ka jingjyrngam ki dieng ki siej, u syntiew u phlang ba la nang pynitynnad shuh shuh da ki wah bad ki wah duid bakhuid khliir khliir ryngkat ka jingnoh rymphum ki kshaid ha kiba bun ki bynta jong kane ka ri. Dei kane ka daw ba ki 'riewshang pyrthei ki kiew sha kine ki lum ban shem ia ka jingkmien bad jingsngewbha ia kiba la pyniwbiñ suhsienng da ki bun jait ki syntiew iwbih 'tiewdieng bad 'tiewdohmaw'.

Ki Hima Khasi-Jaiñtia ki long ki jingsynshar paitbah bad ia kane ka ri jong ngi la sin da u Phareng ba ka dei ka ri jong ki 30 Syiem bad ki 12 Doloi. Ki Syiem ki dei tang ki khlieh jong ka hima kiba don khyndiat eh ka bor ba la pynkup da ka hima. Ia ki hima la pyniaid da ki Dorbar Syiem kiba ka rai jong ki ryngkat bad ki Syiem la pyntreikam da u Syiem bad ki myntri

Katkum ka bynta ba la sot na ki jingbuh jingthoh jong u Major White uba la synran ia u David Scott sha Nongkhlaw ha u bnai November, 1826 ia kaba u la pynpaw ia ka dur jong ka Dorbar Hima ka Hima Khatsawphra ba la tip da u Phareng kum ka Hima Nongkhlaw, "Da ka jingbym bna bad ka jingbym shemphang shaphang ka rukom pyniaid dorbar kine ki briew kaba long katkum ka dustur-riti jong ki, ka la pynkyndit bynríew ia nga ban iohi ba kumba 500

ne 600 ngut ki rangbah kiba la wan tuid sha ka jingialang Dorbar ha ki jingriam shipai bad la ka ryntieh u khnam, ka stieh, u sum bad ka waitlam arliang syrti ia kiba la shong donakor katkum ka akor ka burom Dorbar kine ki Khasi kaba iasyriem bad ka jingshong Dorbar ki Roman. Ka jingwan hiar kynsan jong ki sha kane ka lypung Dorbar ryngkat ka riam ka beit baryntih lyngba ki lum baitynnad ka pyniphuh iphieng baroh sawdong. Haba ki la iashong tawiar Dorbar katkum ba la pynbeit ha la ka jong ka jong ka kyrdan, u Syiem u la ieng nyngkong eh ban pynpaw hakhmat ka Dorbar ia ka jingtyrwa jong ka Sorkar Phareng. U nongialam na ka liang pyrshah u la ieng bad ainia aidaw pyrshah ia katei ka jingtyrwa ba ka lah ban wallam bad pynmih ia ka jingma jong ka synshar khadar laitluid ka Hima kaba ka jingkren bajlan jong u kaba khlem jingthut pynban ha ka jingkren kaba donburom donakor bad i-shongkun. Hadien ba u la shong, la ieng sa u nongialam na ka liang synshar uba long u nongkren na ka liang Syiem bad ki jingiasaid Dorbar ki iai bteng na baroh arliang haduh janmiet. La pynlyngngoh lyngngaiñ ia nga ban iohi ia ka rukom iatai nia Dorbar ba i-shongkun bad i-donburom. Ym don kano kano ka jingkem ktien ne woh nia na baroh arliang katba dang ieng bad kren Dorbar da uno uno ne kano kano ka liang. Ka Dorbar hi baroh kawei ka shah shkor bad iashim bynta katkum ka jingpyniaid Dorbar.

Nga la ioh lad ban leit jngoh ia ka Dorbar ka ri Bilat ha St. Stephen hynrei nga shem ba ka Dorbar

ki Khasi ka long kaba iaidei bad i-donburom bun shah ban ia katei ka Dorbar. Katei ka Dur bad ka rukom shong Dorbar ki Khasi ka pynkynmaw ia nga ia ka jingbatai shaphang ki Red Indian ka North America da u Robertson, u Chateoudriend bad u Cooper. Katkum ka jingsngewthuh jong nga baroh shikatta, nga ngeit ba ka jingsynshar khadar jong ki ka dei ka jingsynshar jong u Syiem bad ki Bakhrav Batri hynrei hadien ba nga la wad bniah bad ioh jingtip shaphang katei ka dur synshar, nga shem ba ka long ka jingsynshar paitbah (Republic); u Syiem bad ki Bakhrav Batri ki don khyndiat eh ka bor halor u khun u hajar...”

Ka jingiaroh kaba wan kat na utei u rangbah shipai Phareng ka pynshisha haduh katno ki Khasi ki la nang ban pyniaidei ia ka dur synshar paitbah lade naduh hyndai hynthai. Ka jinglailuid ka don ha ka mynsiem jong uwei pa uwei u briew. Kane ka dei ka dur longbriew kaba shisha bad bashlur jong ki Khasi mynnor, kiba u Phareng u hap ban ialeh thma bad kam long ei ei kaba phylla ba ka thma bad u Phareng ka la neh la jan 4 snem wat hapdeng ki tiar ialeh thma ki long ki bym biang bad ki bym iadei dur bad ki tiar ialeh thma u Phareng. Haba ngi bishar ia katei ka bor bad ka buit ialeh thma u Khasi lyngba ka jingiatylli kawei bad ka jingkheih duh iala ka jong ka jingim na ka bynta ka jinglailuid ka ri bad ka jaithynriew, ka pynpaw ia ka dur bashisha ka hok longbriew ka jaithynriew kiba watla ki la rem ha ka thma ki iai sah jingkynmaw ia ka mynsiem bashynrang bad ka jingkut jingmut

baskhem ha kaba ki nongialam rangbah ki la kñia  
ia la ki jingim kum ki martyl jong ka ri.

## ***Ki Hima Khasi – Jaiñtia Ha Shuwa Ka Jinglailuid***

Ka ri Khasi-Jaiñtia ia kaba la tip mynta kum ka  
Bri U Hynñiewtrep ha shuwa ka Jinglailuid ka Ri  
India ka don 25 tylli ki Hima Khasi bad ka Hima  
Jaiñtia ia kaba la sin kyrteng hadien da ka  
Jaiñtiapur. Baroh kitei ki Hima la synshar da ki  
Dorbar Hima bad ki Dorbar Syiem, kiba long ki bor  
kiba ha khlich duh ha la ki jong ki jong ki Hima.  
Wat la ki rukom synshar khadar ki ia syriem, pynban  
ki tnat synshar ki iapher kawei na kawei pat ka  
Hima.

## ***Ka Hima Jaiñtia***

Ka Hima Jaiñtia ka don khatar tylli ki tnat  
synshar ba la tip kum ki Jylli Synshar Doloi hapoh  
ka Dorbar Hima Jaiñtia kaba don ha Jaiñtiapur. Ia  
ka nongbah jong ka Hima Jaiñtia la pynkynriah na  
Nartiang sha Jaiñtiapur. Kane ka dei namar ba ka  
jingmih ha katei ka Hima ki wan kham bun na ki  
bynta ri thor kiba hap hapoh ka Hima Jaiñtia.

Dei na kane ka daw ba ka jingsynshar bad ka  
jingbishar ha ki lum Jaiñtia la pynshet tylli ha kitei  
ki khatar tylli ki Jylli Synshar Doloi. Katba ki sngi



ki nang iaid, ka jingsynshar Dorbar Syiem bad Dorbar Doloi ka la nang ia jngai lait tang ha ki rukom leh niam kyrpang ha Nartiang kiba long tang shisien shisnem.

U Syiem bad ki myntri kiba synshar bad bishar ha Jaiñtiapur ki ju pynlong ia ki Dorbar Hima ha kaba ki Doloi ki ju ia shim bynta.

La ong ba ki Doloi ki bat ha lade ia ka kam synshar khadar bad ki jingbishar ki bym ju poi koit sha ka Dorbar Syiem ha Jaiñtiapur.

### ***Ka Hima Jaiñtia Hapoh Ka Jingsynshar Phareng***

Ka long kaba donkam ban ai ia ka histori lyngkot jong katei ka Hima kum ka nuksa jong ki jingjia kiba la jia lyngba bad hadien ka thma lada Ri ki Hima Khasi pyrshah ia ka jingwan knieh bor synshar u Phareng ia kine ki lum baieit ka Ri.

Ia u pud u sam ka Hima Jaiñtia la wan hiar thma da u Shipai u Pyrton ki Phareng hapoh ka East India Company ha u snem 1774. Ia kane ka thma iaknieh pud la bteng man la ka teng, bad khatduh ka thma kaba jur ka la long ha ka snem 1821 ha kaba ki Phareng ki la jop ia ka kynhun shipai u Syiem Jaiñtia. Ka daw jong kane ka thma ka long ba ki Phareng ki kynnoh ba ka Hima Jaiñtia ka la ailad ia ki kynhun Shipai Burma ban wan jop thma ia ki lum Cachar kiba don hapoh u pud u sam ka Sylhet District kiba don hapoh ka jingsynshar ki Phareng.

U David Scott uba long u Political Agent ki Phareng ha kato ka por u la shim kabu ia ka jingtlot ka bor shipai u Syiem Jaiñtia ha kata ka por, bad u la pynbor ia u Raja Ram Sing ban soi bad aiti ia ka bor iada ri hapoh ki Phareng (British Protectorate).

Ka Sorkar Phareng na Calcutta ka la ai jingbit ia u David Scott ban shna surok hapteng ka Sylhet bad ka Assam lyngba ka Hima Jaiñtia. Na ka bynta kane, u David Scott u la iashem ia u Raja Ram Sing bad u la iasoi ia ka jingiateh kular hapteng ka bor synshar Phareng bad ka bor Hima Jaiñtia ban iasnoh kti lang ha kaba shna ia katei ka surok. Ia kane ka jingiateh (agreement) la iasoi da u David Scott bad u Raja Ram Sing ha ka 10 tarik u March, 1824.

Hadien ba ka thma hapteng ki Phareng bad ki Burmese ka la kut, u David Scott u la bat ia la ka kular bad kumta la ithuh ia ka Hima Jaiñtia kum ka Ri Laitluid da ki Phareng. Shuh shuh ruh ka bor synshar Phareng ba synshar ha Calcutta ka la pynpaw ia ka jingsngewnguh ia u Raja Ram Sing bad ka Dorbar Hima namar ka jingiatrei lang ryngkat ryngkat bad ki bor pyniaid u Political Agent. Kum ka dak jong kata ka jingsngewnguh, u Governor General ka Ri India uba don ha ka Nongbah jong ka bor synshar Phareng ha kata ka por kaba long ha Calcutta u la ai sngewbha ia u Raja da ki bun tylli ki iing-jaiñ bad ki tiar-tem tiar-put kynthup ia ki jingdonkam baroh kiba iadei ha ka liang ka tem ka put.

Kum ka jingsngewnguh kylliang, u Raja Ram Sing bad ka Dorbar Hima ki la ai sngewbha ia utei u nongsynshar Phareng da ki jaiñ-kup Syiem bad ar tylli ki hati.

Kane ka jingiasuk kam shym neh slem bad ka la kut noh hadien ka jingiap u David Scott ha Saitsohpen, Sohra ha ka 28 tarik u August, 1831.

Ki Political Agent kiba bteng ia u David Scott kim iahap jingmut satia bad ka jingiateh kular u David Scott ha ka jingiadei synshar laitluid u Syiem bad ka Hima Jaiñtia. Kumta ki la wad daw wad dong ia ki jingjia kiba iadei ha ka kñia ka khriam ka Hima ha Nartiang kum ka jingkynnoh ba ki kñia ia ki raiot ka Sorkar Phareng da u Syiem Raid ka Hima Jaiñtia.

Kaba kham sngewsih shuh shuh ka long ka jingkhlad noh u Raja Ram Sing ha kaba sdang jong ka snem 1833. Ia ka khet synshar ka Hima Jaiñtia la shimti da u Pysa Ksiew jong u, u Raja Rajundar Sing uba dang 17 snem ka rta.

### ***Ka Jingsynshar Hapoh U Raja Rajundar Sing***

Utei u Raja Rajundar Sing u la shimti synshar ia ka khet u kñi tymmen jong u, u Raja Ram Sing hadien ka jingkhlad noh jong u. Kane ka la jia ryngkhat ha ka por ba ki Phareng ki la iateh iasuk bad baroh ki Hima Khasi hadien ba u Syiem Tirot

Sing u la mynjur iasuk bad ka East India Company, ha ka 13tarik u January, 1833 hadien ba u la iashem lai sien lai wat bad ki rangbah shipai Phareng. Kata ka long ynda haba ki bor shipai Phareng ki la kubur ban pynsah ia ki hok ki khun ki hajar ki Hima Khasi halor ka khyndew ka shyiap bad ki dustur ki riti bad ka synshar khadar ha ki Dorbar Hima tangba kin hap noh hapoh ka Syiem Bilat. La jan baroh ki Syiem Khasi ki la ia soi ia ki Treaty kat kum kitei ki kyndon ba la kdew haneng, katba ka Hima Jaiñtia ka la ioh ia ka jingsynshar laitluid hadien ka jingjop thma ki Phareng ia ki Burmese kiba synshar ha Assam ha kaba ka Hima Burma ka la iasoi iasuk bad ki Phareng ha ka Treaty ha Yandaboo ha ka snem 1826.

Hadien ba u T.C. Robertson u la shimti kum u Political Agent ka East India Company, u la sdang pynmih ki daw pyrshah ia u Raja Rajundar Sing bad ia ka Dorbar Syiem. U Robertson u bym ju iahap jingmut bad u David Scott ha ka jingiateh iasuk ha ka snem 1824, u la sdang ban pynmih ki daw kawei hadien kawei tang ban ioh klun ia ka Hima Jaiñtia baroh kawei khamtam eh ia ki pyntha rep baseisoh jong ki hynñiew tylli ki pyntha kiba don harud ki wah. Nyngkong eh, u la pyntip sha ka bor Sorkar ha Calcutta ba u Raja Rajundar Sing bad ka Hima Jaiñtia ki la ioh ia ka jingiada ki bor shipai Phareng khlem siew ei ei. Hadien ba u la ioh ia ka jingmynjur jong katei ka bor synshar, u la leit iashem ia u Raja Rajundar Sing ha ka 25 tarik u May, 1833 ha kaba u la ai ia ka jingdawa ba ka Hima Jaiñtia ka dei ban

siew ia ki Phareng 10,000 tyngka shi snem na ka bynta ka jingiada ia ka Hima Jaiñtia da ka East India Company. Lym kumta kin hap ai noh ia kitei ki hynñiew tylli ki pyntha baseisoh sha ki Phareng kiba ka jingmih jong ki ka long da ki phew hajar ka khajna kaba ki nongrep ki siew sha ka pla pisa u Syiem manla ka snem. U la buh ia kitei ki jingdawa kiba u tip skhem ba u Syiem bad ka Dorbar kin ym lah ban pdiang khnang ba un ioh ka daw kaba biang ban pynrung ia ka map ka Hima Jaiñtia hapoh u pud u sam ka East India Company.

Kane ka la pynkyndit bynriew ia utei u Raja u ba khlem khmih lynti ba ki jingthmu bad jingdawa jong u Robertson kin long pyrshah ia ka kular jong ka Sorkar Phareng hapoh ka jingialam u David Scott. Kim shym khmih lynti ba ka Hima Jaiñtia kaba la iateh lok bad ki Phareng kan hap ha kane ka buit shet kylla ki Phareng kaba palat ia ka akor bad ka burom briew.

U Robertson u la kynnoh ruh ba ha ka por u Raja Ram Sing la kñia ia ki raiot jong ki Phareng ha Nartiang, ka jingjia ia kaba u Raja Ram Sing u la iapynbeit bad ki Phareng ha ka por ba ki la iaklet bad iasuk ha ka snem 1826 ha kaba ki bor Sorkar Phareng ki la ithuh ia ka Hima Jaiñtia kum ka Ri Laitluid, hadien ba ia ka jingiada ki Phareng (British Protectorate) la pynkut.

U Raja Rajundar Sing u la pyntip sha ki Bor Sorkar ka East India Company ha Calcutta ba kitei ki jingkyntoh beiñ u Political Agent kim long kiba shisha bad ki bym don nongrim. U la pyntip ba ka

jingdawa u Political Agent ka long palat ia ka bor jong u bad ki Myntri bad ia kane u Raja u la pynpaw shai ba un sa buh ha khmat ka Dorbar Hima kaba dei ka bor ba ha khlieh duh jong ka Hima Jaiñtia.

Ka Sorkar Phareng ha Calcutta kan shym pdiang satia ia ka jingai jingmut u T.C. Robertson ban dawa ia u Raja ban siew 10,000 tyngka shi snem kaba long pyrshah ia ka jinglaitluid katei ka ri. Kim pdiang ruh ban knieh ia ki pyntha hapoh u pud u sam ka Jaiñtiapur, ka them Sarma bad ia ka Raid Gobha hapoh u Syiem Raid Sobha Sing kaba don ha ki pyntha iakhap bad ki them ka Assam.

Shen, ka Sorkar Phareng ka la pynkut ia ka kam Political Agent u Robertson bad aiti noh ia kata ka kam ha u Francis Jenkins. Une u Jenkins u long u briew uba iaaid beit bad uba kwah ban ai jingmut ia ka Sorkar Phareng ban leh ia kaei kaei ka ban wan rah jingsuk hapoh ka Hima Jaiñtia khamtam ha ka jingiadei bad ka Sorkar Phareng.

Ki Bor Sorkar ha Calcutta ha kata ka por kim iahap jingmut satia bad ka rukom trei kam une u Ophisar, kumta ka la pynkut noh ia u na ka kam Political Agent ha u bnai January, 1835. Ka la thung ia u Captain Lister kum u Political Agent ha u bnai February, 1835. U Captain Lister hadien ba u la ioh pdiang ia ka rai na ka Sorkar Phareng u la leit da lade sha Jaiñtiapur ha u bnai March, 1835 bad u la pynbna ia ka rai jong ka Sorkar Phareng ba ka la knieh noh ia baroh ki pyntha jong ka them Sarma kaba hap hapoh u Syiem Jaiñtia.

U Captain Lister u la ialam ruh ia u sha Sylhet ban iashem ia ki bor kiba kham halor ha kaba ki la set pynban ia utei u Raja haduh ba un da soi ia ka Treaty ba u la aiti mon sngewbha ia ka Hima Jaiñtia baroh kawei ban hap noh hapoh u pud u sam ka East India Company. Iadien ba u la soi ia katei ka Treaty, ka Sorkar Phareng ka la ai penshon ia u 500 tyngka shi bnai, ka Bangla kynthup ia ka kper ka phrah bad ki lyngkha nalor ki shakri – shakor. Ka Sorkar Phareng ka la mana bad adong ia u ba um dei ban mih shabar na ka nongbah Sylhet lane iashem ia ki briew na ka Hima Jaiñtia.

### ***Ka Hima Shyllong***

La seng ia ka Hima Shyllong da ki Khatwei ngut ki Bakhraw bad ki San Basan. Kane ka Hima ka long kaba iar kaba kynthup ia u pud u sam naduh ki rud ka wah Brahmaputra shatei haduh ki rud jong ka wah Sarma shathie, ka Hima Jaiñtia sha mihngi bad ka Garo Hills sha sepngi. Bun ki bynta jong kane ka Hima ki long kiba sah khlaw tad ynda haba ki khun ki hajar ki leit ban buhai shnong bad seng la ki Raid ki Hima ia kiba la ithuh da ka Hima Shyllong.

Napdeng ki San Basan, kata, u Basan Nongkseh, u Basan Nongumlong, U Basan Mawlieh, U Basan Mawshai bad u Basan Swer, ka Raid u Basan Swer bad ki khun ki hajar hapoh u pud u sam jong kane ka Raid ki la dawa ha ka Dorbar Hima Shyllong ba

kin shimti ia ka jingsynshar ha lade. Ka nongbah jong u Basan Swer ka don ha Sohra. Ia kane la mynjur ban ithuh da ka Dorbar Hima Shyllong. Ka Dorbar Hima Sohra ka la jied ia u Basan Swer ban long u Nongsynshar kum u Syiem jong ka Hima Sohra. Ia ka kpoh kaba une u Basan Swer u mih, la ithuh da ka Dorbar Hima kum ka kpoh long Syiem kaba don hok ruh ban hiar pateng kum ki Syiem kiba ka Hima kan jied pateng la pateng.

Ha ka por jong ka jingwan jop ki Phareng ia ka them Sarma bad ia ka them Brahma, ka Dorbar Hima Shyllong ka la phiah ia ka jingsynshar hapteng ki artylli ki Iing-Syiem : kawei ka long ka Iing-Syiem Nongkrem kaba shimti ia ka jingiada ia u pud u sam kaba iadei bad ka them Sarma bad kawei pat ka dei ka Iing Syiem Myllem kaba shimti ban iada ia u pud u sam kaba iadei bad ka them Brahma. Ia kane ka Rai jong ka Dorbar Hima Shyllong la ai jingmut hi da u Bormanik, u Syiem jong ka Hima Shyllong na ka daw ba u kwah ban shang kylleng ki Hima Khasi ban pyniatylli kum ka jaitbynriew pyrshah ia ka jingwanthombor ia ka jinglailuid jong ka ri. Kumta, hadien ka jingphiah ia ki arbynta jong ka Hima Shyllong, la aiti ia ka jingialam jong ka ha ki arngut ki Syiem Khyannah, kata, u Sing Manik Syiem u ban ialam ia ka Dorbar jong ka Iing Syiem Nongkrem ryngkat bad ki Basan bad ki Bakhraw bad ia u Shan Manik Syiem ban ialam ia ka Dorbar hapoh ka Iing Syiem Myllem ryngkat ki Ar Basan bad ki San Bakhraw. Kine ki Iing-Syiem ki long kiba mih na kajuh ka thymmei.



Haba la kem ia u Syiem Bormanik ha madan thma ha Mawpat, la ialam ia u bad ka kynhun shipai jong u sha Guwahati ha u bnai September, 1829. Ia une u Syiem bad ki nongbud jong u la pyllait noh da u David Scott hadien ba u la pynsoi ia ka jingteh soksular (treaty) ha ka 15 tarik u January, 1830. Ha kane ka jingiateh, la ithuh da u David Scott ia ka bynta ba la bat da ka Iing-Syiem Nongkrem kum ka Hima Nongkrem ia kaba la tip da ki Phareng kum ka Hima Khyrim, bad ia ka bynta ba la bat da ka Iing Syiem Mylliem la ithuh kum ka jingsynshar hapoh ki Phareng lyngba u Shan Manik Syiem kum u Manager tad haduh ba un da pyndep ia ki jingteh ba la kubur bad soi da u Bor Manik Syiem. Ha katei ka Soksular, la iateh ban pynbha ia ki lynti kulai jong u David Scott ba la pynjot da ka thma hapdeng ki Hima Khasi bad ki Phareng bad kiwei de ki jingiakut.

Hadien ba u Shan Manik bad ka Dorbar ki la pyndep lut ia kitei ki kyndon, ia u Shan Manik bad ka Dorbar hapoh jong u la ithuh kum ka Hima Mylliem ha ka snem 1834 hynrei la khate noh ia ki Raid Laitlyngkot, Laitkroh, Marbisu, Nongpoh bad Myrdon bad la pynlong ia ki kum ki Ilaka Sorkar hapoh ka jingsynshar ki Phareng.

Kane baroh ka la jia hadien ba u Syiem Bormanik bad ki kynhun ialeh thma hapoh jong u ki la iasoh bad kiwei ki kynhun hapoh ka jingialam u Syiem Tirot Sing bad ki la ialeh ia ka thma kai khlaw kaba la neh la jan kumba 3 (lai) snem ei ei.

Ha ka por ka jingiabate synshar ia ka Hima Shyllong, la pyniabynta ia ki Raid jong ki Saw Basan, kata u Basan Mawlieh bad u Basan Mawshai ki hap ha ka liang synshar jong ka Iing-Syiem Nongkrem katba ia kiwei ki Ar Basan, kata, u Basan Nongkseh bad u Basan Nongumlong ki hap ha ka liang ka Iing-Syiem Myllichem.

Ia ki Bakhraw ka Hima Shyllong la pyniakhlad ha ki arbynta. Ha ka liang ka Dorbar ka Iing-Syiem Myllichem, 5 ngut ki Bakhraw ki long kiba mih khmat ia ki Kur Lyngdoh Myllichem, Kharkongor, Kurkalang, Nongkhlaw bad Sohtun. Ha ka liang jong ka Iing-Syiem Nongkrem, ki Bakhraw ki long kiba mih khmat ia ki kur, kata, Myllichemngap, uba long ruh u Lyngskor, Lyngdoh Nongkrem, Warbah, Pyngrope, Myllichempdah bad Khyriemmujaat.

Ka Hima Shyllong ka long ka Hima kaba heh tam ha ki lum Khasi. Kane ka Hima bad ka Hima Jaiñtia ki mih hadien ka Hima Madur Maskut. Ia kane ka Hima la sdang kum ka Raid Saw Kur Saw Kher. Dei tad haduh ba u khun u hajar u la nang roi bad iar bad hadien ba ki la ioh ia ka Syiem kaba ki la pynkup da ka Dorbar kum ka Syiem jong ka Hima ia kaba la sin kyrteng "Ka Pahsyntiew".

Ki Khatwei Bakhraw bad ki San Basan ki la seng ia ka Hima kaba ki la jer kyrteng ka Hima Shyllong ia kaba la pdiang bad mynjur da ka Dorbar Hima bad hadien ba ki la ring Kongngor bad seng ia ka Iing-syiem, ki la pdiang ia ka Pah Syntiew kum ka Syiem bad la bteng ia ka jingsynshar ka Hima da ki khun ki ksiew jong ka.

Ka Hima Shyllong ka kynthup ia ki Khatwei Bakhraw bad ki San Basan kiba la iadon ryngkat bad ki Myntri ha ka jingsynshar bad pyniaid ia ki hima katkum ki hok, ki dustur bad ki riti kumba la seng bad saiñdur hadien ka jingiakhlad Hima bad ka Hima Jaiñtia ha kiba ka khlieh treikam jong ka ka long ha Nartiang ha kata ka por. Ka nongbah kaba nyngkong eh jong ka Hima Shyllong ka long ka Nongkseñ Rim kaba don harud ka wah Umshyrpi.

Katba ki snem ki nang iaid, la mih bun ki Hima ia kiba la ithuh da ka Hima Shyllong. Ka Hima Shyllong ka la hap ban shimti ia ka jingkit khlieh ban iada ia u pud u sam bad pyniasnoh ia kiwei ki Hima ha ka jingiadon kti lang ban iada ia u pud u sam jong baroh ki Hima Khasi na ka jingwantap pud kiwei ki Hima kum ki Ahom, ki Bodo, ki Burmese, ka Hima Moghul bad ka East India Company kaba don ha Calcutta.

Ia kane ka Hima, u David Scott u la kylli na ki nongsynshar jong ka Hima Jaiñtia ha ka por ba ka Hima Jaiñtia ka la don hapoh ka jingiada ki Phareng ha ka snem 1824. Kitei ki nongsynshar ki la iathuh ia u David Scott ba katei ka Hima kaba iakhap pud shaphang sepñgi ka dei ka Hima ki Khyñriam, ia kaba u David Scott u la khot da ka Hima Khyrim.

Ha ka por ba u David Scott u la pynsoi ia ka Agreement u Syiem Bormanik ha ka snem 1830, u la pynsoi ia utei u Syiem kum u Raja Khyrim, ki kyntien ha ka Phareng ki long, "TRANSLATION of the Articles of Agreement given to the Honorable Company by Bormanick, Rajah of Khyriem in the

year 1830" ia kaba u Syiem Bormanik u la soi kum u Syiem ka Hima Khyrim.

### ***Kiwei Pat Ki Hima Khasi***

Ha ri Khasi, ki Dorbar Hima bad ki Dorbar Syiem, ki Dorbar Lyngdoh bad ki Dorbar Sordar ki ia syiem wat la ka jinglong jong ki ka iapher na ka daw ba ki don ki hima kiba heh, kiba pdeng bad ki don ruh kiba rit kiba kynthup wat tang ia kawei ne ar tylli ki shnong hapoh u pud jong ka Hima. Ia kitei ki Hima la synshar da ki Syiem, ki Lyngdoh, ki Sordar bad Wahadadar.

### ***Ka Synshar Khadar Bad Ka Bishar Ki Dorbar Hima Hapoh Ka Jingsynshar Phareng***

Hadien ka jingpyndem wait ki Hima Khasi bad ka jingiateh iasuk u Syiem Tirot Sing Nongkhlaw bad ka East India Company, ia ka jingsynshar ki Dorbar Hima la pyniaid katkum ki jingiateh soskular (treaties) ba la soi da uwei pa uwei u khlieh synshar ia kiba la pynrung ha ka Thup ba la tip kum ka Acheitson's Treaties.

## ***Ki Jingkylla Ha Ka Synshar Khadar Hapoh Ka Jingsynshar Ki Phareng***

Ka Sorkar Phareng kaba ka khlieh treikam (Headquarter) jong ka ka don ha Fort William, Calcutta, ka la pynbeit ba ki khun ki hajar ki Hima Khasi kin bat ia la ki hok ki riti bad ki dustur ha baroh ki liang jong ka imlang sahleng bad ka synshar khadar. Kane ka kynthup ruh ia ki dustur bad riti bad ka hok halor ki khyndew ki shyiap, ka hiar pateng bad ka ioh pateng bad ka jingmane laitluid ha la ka jong ka jingngeit niam. La tip ia ki Hima Khasi kum ki Semi-Independent State, katba ia ka Hima Jaiñtia pat la shimti synshar da ka Sorkar Phareng naduh ka snem 1835. Shuwa kane, u Raja Ram Sing, u Syiem Jaiñtiapur u la soi ia ka soksular ban don hapoh ka jingiada ka Sorkar Phareng (British Protectorate) da ka jingpynbor u David Scott ban ioh jingiada na ka jingwan hiar thma ki Burmese na ki thaiñ Cachar.

Ka Sorkar Phareng ka la knieh ruh ia ki katto katne ki bynta jong ki Hima Khasi ne ki shnong jong ki Hima bad pynlong ia ki hapoh ka jingsynshar ki Phareng ia kiba la tip kum ki Ilaka Sorkar (British Sirdarship). Kine ki long ka Nongpoh, ka Myrdon, ka Marbisu, ka Laitlyngkot, ka Laitkor, ka Saitsohpen, ka Sohbar, ka Mawmluh, bad kumta ter ter. Baroh kine ki Ilaka Sorkar hapoh ka jingsynshar Phareng kynthup ia ka ri lum Jaiñtia ki hap beit hapoh ka jingpeit bad jingsynshar u Deputy Commissioner. Ki trai ri kiba hap ha kitei ki Ilaka

bad ha ri lum Jaiñtia ki hap ban siew khajna man  
la ka snem sha ka Sorkar Phareng.

Ka khaii-pateng u khun Khasi-Pnar ka la don  
lypa naduh shuwa ka jingwan ki Phareng haba ia u  
nar, u mawshun, u dewiong, ki soh ki pai, bad kiwei  
de ki mar rep, ki mar khlaw la ju shallan da ki trai-  
ri shaduh Dacca, ka nongbah jong ka Bangladesh  
kaba mynta ban pynbiang ia ki jingdawa ki karkhana  
jong ki Phareng, ki French, ki Portugese, ki Dutch  
bad kiwei de ki jaitbynriew jong ka ri Europe. Ki  
Khasi ki la nang ruh ban thied ban pet ia ki  
jingdonkam ka jaitbynriew kum ki mar bam mar  
dih, ki dohkha bad kiwei ki jingdonkam kum ki tin  
umphniang sharak bad kiwei kiwei ki jingdonkam  
ha kaba tei ia ki iing ki sem, ki jingbuh jingsat bad  
ki marbam mardih. Namarkata, ka jaitbynriew trai-  
ri ka la don lypa ka jingmlien bad ka sap khaii  
pateng ha ka jingiadei bad ki ri ba marjan marpa.

Kawei ka jingmyntoi ba ka jaitbynriew ka ioh  
hapoh ka jingsynshar ki Phareng ka long ka  
jingwanpoi ki Missionary kiba la hikai ia ka thoh ka  
tar, ka pule ka dangle khamtam ka jingpynmih bad  
jingshon ia ka Bible Khasi. Kine ki Missionary ki la  
seng ia ki skul Mission ha Sohra, Laitkynsew,  
Mawkhar, Mawphlang bad Jowai bad ki la pyniar ia  
ki skul rit bad bteng haduh ki skul pdeng. Kumta, u  
paid Khasi-Pnar u la nang ban tip bad pule ia la ka  
ktien ka thylliej bad ka rukom im ban nang kham  
pynbha ia la ka riam ka beit, ka bam ka dih, ka iaid  
ka ieng, kum kiwei pat ki jaitbynriew kiba la kham  
shai.

Dei ha ka juk synshar Phareng ba ki Khristan ka pynmih ia ki skul heh (high schools) bad wat ki skul bah (colleges) ha ka Nongbah Shillong. Ka Ri ka la pynmih bun ngut ki ba la pas ia ki eksamin matrik, intermediate bad graduate. Ki la mih ruh ki doctor, ki professor, ki pastor, ki nongthoh kot bad kiwei kiba la leit pule shaduh Guwahati, Sylhet, Calcutta bad shaduh bar-ri ruh kumjuh.

### ***Ka Jingialeh laitulid ka ri India***

Khyndiat ngut eh ki trai-ri ki la ia shim bynta bad ka jingiakhih laitulid ka ri India. Ka daw ka long namarba ka jingiadei jong ki ha ka khaii ka pateng, ka trei ka ktah bad ki ri thor ba marjan ka pynsheptieng ia ka jingshahtyllep ha u heh paid ri thor kaba lah ban ktah ia ka imlang sahleng ba laitulid jong kane ka ri u Hynñiewtrep. Hynrei don katto katne ngut kiba la ia shim bynta ha katei ka jingiakhih laitulid bad kiba la iasnoh kti ruh bad ki seng bah ka ri India.

Ka jinglaitulid jong ka ri India ka la wallam bun ki jingkylla ha ka synshar ka khadar ka ri Khasi-Jaiñtia na ka daw ka jingiadei bad ka synshar khadar ka ri India. Ia kine ki jingkylla la kynthup ha ka riti synshar ka ri India ia kaba la tynsat ruh ia ka jingsynshar District Council hapoh ka Sixth Schedule jong ka Constitution ka ri India.

***Ka Jingsdang Jong Ka United Khasi  
- Jaiñtia Hills Autonomous District  
Council (1952-1957)***

Ka Dorbar Thaw Riti jong ka Ri India (Constituent Assembly) hadien ka jinglailuid ka la pynjari ia ka Constitution ka Ri India ha ka 26 tarik u January, 1950 bad la tynsat ia ka Sixth Schedule na ka bynta ki 5 tylli ki District Ri Lum ka Assam kaba kynthup ia ka United Khasi-Jaiñtia Hills, Garo Hills, Lushai Hillis ia kaba la tip mynta kum ka Mizoram, ka United Mikir (Karbi Anglong) – North Cachar Hills bad Naga Hills ia kaba la tip mynta kum ka Nagaland.

Kitei ki Autonomous District Council lait noh, ka Naga Hills, ki la pynlong ia ki Election jong ki Dorbar Thaw-Aiñ ha u February, 1952 ryngkat bad ki Election ba nyngkong hadien ka jinglailuid sha ka Dorbar Bah Thaw-Aiñ ka Ri India (Parliament) bad ruh sha ki Dorbar Thaw-Aiñ ki jylla ka Ri India.

Ka Naga National Council jong ki Riewlum Naga hapoh ka jingialam u A.Z. Phizo, ka la kyntait (boycotted) ia ka Election, kata, sha ka Parliament, ka Dorbar Thaw-Aiñ ka Jylla bad ka Autonomous District Council namarba katei ka Council ka dawa ban synshar hi ia la ka jong ka ri shabar jong ka Ri India.



## ***Ka Jingsdang Synshar Ka District Council Ha Ri Khasi – Jaiñtia***

Ka Autonomous District Council Advisory Committee (1950) ka la thaw ia ki Rule na ka bynta ka jingbuh beit buh ryntih ia ki Constituency bad ruh ia ki rukom pyniaid ia ka District Council ha kaba sdang tad haduh ba ka Council kan da pynbeit ne shna ia ki rule da ka Dorbar Thaw-Aiñ jong ka.

Wat la u paidbah Khasi-Pnar u la jied ia la ki jong ki nongmih khmat, u Governor u la lah ban pynjari ia ka District Council haduh ka 27 tarik u June, 1952 ha Dinam Hall, Jaiaw ha kaba la pynsmai ia ki 18 ngut ki Elected Member bad ia ki 6 ngut ki Nominated Member ba la thung da ka Sorkar Assam kat kum kitei ki rule ba la kdew haneng.

### **Ki 18 ngut ki Elected Member ki long kine harum**

1. Bah H. Enowel Pohshna - War Jaiñtia  
(uncontested)
2. Dr. R. K. Tariang - Jowai
3. Bah Lewis Bareh - Rymbai.
4. Bah Humphrey Hadem - Shangpung.
5. Bah Harison Sariang - Nartiang.
6. Bah Brojo Roy - Shella.
7. Bah Rostanwel War - Sohbar.
8. Rev. Lasto Sing Diengdoh - Sohra.
9. Bah Henry Cotton - Pynter – Pynursla.
10. Bah Brojo Mohon Roy - Malki, Shillong.
11. Bah Fredishon War - Jaiaw, Shillong.

- |                          |                   |
|--------------------------|-------------------|
| 12. Bah Hobel Rynjah     | - Umsning.        |
| 13. Bah J.E. Tariang     | - Nongpoh.        |
| 14. Bah Niander Syiem    | - Nongstoiñ.      |
| 15. Bah Rosaia Nongrem   | - Mawkyrwat.      |
| 16. Bah Atiar Sing Syiem | - Umkrem-Mairang. |
| 17. Bah Albert Lyngdoh   | - Sohiong.        |
| 18. Bah Bormanik Syiem   | - Myllichem.      |

**Ki Nominated Member pat ki long kine harum**

- |  |                                     |
|--|-------------------------------------|
| 1. Bah Jo Singh Rynjah   | - Laban.                            |
| 2. Kong Lariam Shullai<br>(Khongwir)   | - Mission<br>Compound,<br>Shillong. |
| 3. Bah Kistobin Rymbai   | - Jowai.                            |
| 4. Mr. Hari Prasad Baruah<br>(Retd. Chief Engineer)                          | - Laban                             |
| 5. Mr. Hemanta Kumar<br>Gupta Spl. Representative of<br>Hindustan Standard). | - Barik, Shillong.                  |
| 6. Mr. Loknath Joshi   | - Mawprem.                          |

*(Ioh ngi klet, dei tang u Mr. Hemanta Kumar Gupta u bym shym la treh ban shim tulop na ka District Council).*

Napdeng kitei ki 24 ngut ki Dkhot, kiba dang im haduh kine ki sngi ki long sa tang arngut, kata, u Dr. R. K. Tariang bad u Bah J. E. Tariang.

Ka Dorbar District Council ha ka jingshong Dorbar kaba nyngkong jong ka ha ka Old Constitution Hall, Secretariat Hill ka la jied ia u

Bah Fredishon War kum u Shongknor (Chairman) jong ka.

U Chairman u la khot (summoned) ia ka Dorbar District Council kaba ar ha kaba la jied ia u Bah Jo Singh Rynjah kum u CEM, bad u Governor u la thung ia ki arngut ki Executive Member halor ka jingai jingmut (recommendation) jong utei u CEM, kita ki long u Bah Rostanwel War bad u Bah H. Enowel Pohshna.

Hapoh ar snem, la don haduh lai tylli ki Executive Committee. Kita ki long, ka Executive Committee kaba nyngkong ia kaba la kdew haneng, kaba ar ka long ka Executive Committee hapoh ka jingialam u Bah Hobel Rynjah kum u CEM bad u Bah J. E. Tariang bad u Bah H. Enowel Pohshna kum ki EM, bad kaba lai ka long ka Executive Committee hapoh ka jingialam u Bah B.M. Roy kum u CEM kynthup ia u Bah Henry Cotton bad u Bah Humphrey Hadem kum ki EM.

Ka la don ka jingpyrkhat kaba khia hapdeng ki Dkhot jong ka District Council kiba kham bun. Kane ka la pynlong ia ki 18 ngut napdeng ki 24 ngut ban pynlong noh da ka kynhun kaba la khot kyrteng, "Ka District Council Parliamentary Party" ha kaba la jied Leader ia u Bah Jo Singh Rynjah, Deputy Leader ia u Bah J. E. Tariang, bad Convener ia u Bah H. Enowel Pohshna. Ka Dorbar Thaw-Aiñ District Council ka la jied ia u Bah Jo Singh Rynjah kum u CEM bad kat kum ka jingai jingmut jong u CEM la thung ia u Bah J. E. Tariang kum u EM. U

CEM u la pynbeit ruh ba u Bah H. Enowel Pohshna un long u EM na ka bynta shisnem shiteng bad ban bujli ia u da u Bah Humphrey Hadem na ka bynta ka por kaba sah jong kata ka District Council. Kane ka Executive Committee ka la neh lai snem shiteng kynthup ia ki hynriew bnai ba la pynjlan (extended), kata, haduh u bnai December, 1957.

Ka Executive Committee kaba nyngkong ka la thung ia u Bah R.T. Rynmbai, u Special Officer ka Tribal Areas Department (TAD) jong ka Sorkar Assam kum u Secretary uba peit lang ia ka Legislative Department bad ia ka Executive Committee ha kajuha ka por.

Ka Executive Committee kaba ar hapoh ka jingialam u Bah Hobel Rynjah ka la thung ia u Bah Pherbak Hadien Bathew ban long u Secretary ka District Council uba dei peit ia ka Legislative Wing hapoh u Chairman. Ka la thung ruh ia u Bah Holando Lyngdoh kum u Secretary jong ka Executive Committee.

Ka Iing Ophis District Council kaba nyngkong ka la long ha ka Iing tnat Ophis bad ka Jail u Syiem Mylliem kaba don hajan jaka ieng-jeep (Jeep Stand) kaba mynta.

Ka District Council ka la thaw katto katne tylli ki Aiñ ha ka snem 1953 kaba kynthup ia ka Administration of Justice Rules, 1953.

Katei ka Executive Committee ka la pynlong ia ka District Council Court hapoh katei ka aiñ. Ka la thung ruh ia u Bah Cromoline Lyngdoh, u District

33/DAC  
30/5/12

bad Session Judge ka Assam ha Dibrugarh kum u Judge bad ia ki ar ngut ki Magistrate, u Bah Osiris Lyngdoh, EAC kum u Magistrate ha ka Kashari Shillong bad u Bah Carlie Thomas, EAC kum u Magistrate ha ka Kashari Jowai.

Ha kane kajuh ka por, katei ka Executive Committee ka la thung ruh ia u Bah M. Pyngrope, SDC kum u Assistant Revenue Officer ha Shillong bad ia u Bah M.S. Jahrin, Senior Advocate kum u Assistant Revenue Officer ha Jowai ba kin iarap ia u Secretary ka Executive Committee uba dei peit ruh ia ki kam Revenue ka Council.

Hadien ka jingshimti synshar ka District Council, la jan baroh ki kam jong u SDO, Jowai Civil Sub-Division ha Jaiñtia Hills la aiti noh sha ka District Council bad kumta ka la don ka jingiapynebeit bad ka Sorkar Assam ba ka Council kan pyndonkam shipor ia ki kamra kiba lait jong utei u SDO.

Ka District Council ka la pyniabynta ia kitei ki kamra hapdeng ka Kashari District Council hapoh u Magistrate bad ia ka tnat Ophis District Council la ai bor ba u Assistant Revenue Officer un pyniaid nador ki kam kiba iadei bad ka Revenue ha Jaiñtia Hills.

Katei ka Executive Committee ka la thaw ia ki jingpynebeit thymmai ha kaba iadei bad ka jingjied nongsynshar kynthup ia ka Hima Shella bad ka Hima Mawlong.

Ha ka Dorbar Hima jong ka Shella ba la khot da ka Executive Committee ha Madan Skul Laitkynsew,

la rai da kawei ka jingmut ban pynduh noh ia ka jingsynshar da ki 4 ngut ki Wahadadar ba la jied shisien lai snem bad ba yn jied paitbah noh tang uwei u Wahadadar man la ka shisien san snem.

Ha ka Dorbar Hima Mawlong ba la khot da katei ka Executive Committee, la rai ba ki 3 ngut ki Sordar kiba dei ban synshar shi jingim ia ka Mawlong yn jied paitbah noh tang uwei u Sordar man la ka shisien san snem.

Ia ka District Council Court ha Shillong la pynlong ha ki kamra ba la pyndonkam da ka Executive Committee ha katei ka iing hajan Jeep Stand ba mynta ryngkat bad shi bynta ki kamra ba la pyndonkam da ka Ophis jong u Chairman. Ka Executive Committee ha kata ka por ka la hap ban kynriah ia ki Ophis jong ka ha ki iing ba la wai na ka Ferndale Hotel pyrshah ka Civil Secretariat.

Hadien ka jingshimti ia ka Executive Committee da u Bah B. M. Roy, la pynkynriah noh ia kane ka Ophis sha Mawkhar ha ka iing jong I Kong Elibon Marbaniang, kaba don mar shiliang surok bad ka iing shong jong i.

Ha ka snem 1955, ka Executive Committee hapoh ka jingialam u Bah Jo Sing Rynjah ka la ioh jingtip ba ka Hospital Mrad (Veterinary Hospital) kaba don ka Headquarter ka Khasi Hills Autonomous District Council mynta la pynkynriah noh sharum ha ka jaka kaba ka don mynta.

Ka Executive Committee ka la shem na ki record jong ka Sorkar ba kane ka jaka ka dei ka Ri Raid

jong ka Hima Myllem ia kaba la shah ia ka Sorkar Assam ha ka por synshar Phareng ban tei ia katei ka Hospital Mrad (Veterinary hospital) bad kat kum ka Agreement, ia katei ka jaka la dei ban pynphai noh sha u Syiem Myllem lada ka Sorkar kam pyndonkam shuh na ka bynta ka Veterinary Hospital.

Ka Executive Committee ka la pan jingbit na u Syiem Myllem (U Syiem Jormanik ha kata ka por) ban ai jingmut ba ka Sorkar kan pynphai noh ia katei ka jaka sha ka District Council na ka bynta ban tei ia ka Headquarter jong ka ia kaba u Syiem bad ka Dorbar ki la mynjur bad ai jingmut sha ka Sorkar Assam kumba la kyrpad da ka Executive Committee. Ka Sorkar Assam hapoh ka jingialam u Shri. Bishnu Ram Medhi, U Chief Minister ka Assam ha kata ka por uba la sngewbha ban ai hukum ia ki Bor Sorkar ban pynphai noh ia kane ka jaka bad ki iing ki sem kiba don ha katei ka jaka sha ka District Council ban tei ia ka Headquarter jong ka. Ia katei ka jaka bad ki iing ki sem la ai sha ka District Council khlem siew dor.

Ha ka snem 1956, haba u Prime Minister Jawaharlal Nehru u la poi ha Shillong, ka Sorkar Assam ka la shah sngewbha ba ka Executive Committee jong ka United Khasi & Jaintia Hills kan ai bam ja miet (Dinner) ia u Prime Minister ha Pinewood Hotel.

Ha kane ka Dinner, ka Executive Committee ka la ai ia ka Memorandum ha u Prime Minister ban

iarap pisa lem ha ka ban tei ia ki ling Ophis, ling Dorbar bad Kashari ha katei ka jaka. U Prime Minister u la ai ktien (Verbal Order) ia u Chief Minister ba un nang ai 6 lak tyngka ia ka District Council, ka pisa kaba un sa pynbeit ban phah na Delhi.

Ka Executive Committee ka la thied ruh ia ka jaka ha ka snem 1956 ha Jowai pyrshah ka lawmusiang ha kaba la tei ia ka ling Ophis bad Kashari ha katei ka jaka.

### ***Ka Relief Programme Na Ka Bynta Ki Thaiñ Ri War***

Ka Executive Committee, hadien ba ka la ioh ia ki jingud na ki paid nongshong-shnong jong ki thaiñ Ri War ha ki snem 1955 ba ka la don ka 'nemsniw bad ka jingshah thngan ha kitei ki jaka, ka la rai ba baroh arngut ki EM, kata u Bah J. E. Tariang bad u bah H. Enowel Pohshna kin leit ban peit hi da lade bad ban ai jingmut sha ka Executive Committee ia kaei ba ka dei ban leh. Ka Executive Committee ka la rai ban thaw ia ka Scheme kumno ban iarap ia kitei ki thaiñ na ka Sorkar Assam hapoh ka Relief and Rehabilitation Programme jong ka 1<sup>st</sup> Five Year Plan lyngba ka Planning Advisory Board jong ka Sorkar Assam bad ka Tribal Areas Department (TAD).

Katei ka Scheme ka kynthup ia ka jingsam ei ia u khaw u kba (Free Distribution of Foodgrains) bad



ban ai ha ka dor ba kham bit ia ki mar bam (Subsidy) lyngba ki Dukan Ration ha man ki jaka pdeng jong ka thaiñ Ri War, bad kaba kham kongsan ka long ban ai jaka shong (rehabilitate) ia kino kino ki brierw na katei ka thaiñ Ri War kiba duk ban ioh jaka ha ki thaiñ Ri Bhoi jong ka Nongpoh Constituency.

U Chief Minister Bishnu Ram Medhi u la shim khia bad kyrpang ha lade ia kane ka jingdawa. Kumta ka Tribal Areas Department (TAD) ka la pynkhreh bad pyntrei kam mardor ia katei ka Scheme. U Chief Minister u la mynjur ruh ban sanction ia ka Scheme kyrpang ban ai jingiarap 950 tyngka ia kawei – kawei ka longiing ban tei ia ki Trep bad ban rep ha katei ka thaiñ Ri Bhoi. Ka Executive Committee pat ka la iapynbeit bad u Adon Sordar jong ka Nongpoh Sirdarship bad u Shonroy Basan Nongkseh bad u Mula Basan Nongumlong jong ka Hima Myllem ban ai jaka ei ia kitei ki para-ri ba shem lanot ha baroh shilynter ki jaka kiba lait naduh Khanapara haduh Umsning. Kane ka la sei ia u soh ha kaba ka jaitbynriew ka la iohi ia ka jingroi ka rep ka riang ha kitei ki thaiñ Ri Bhoi lyngba ka jingai kylluid mynsiem jong kitei ki Nongsynshar haneng.

### ***Ka Development Programme***

Ka Executive Committee ka la thaw bun tylli ki aiñ kum ka Land-Transfer Act, Market Act, Forest Act, Trading by Non-Tribal Act bad kiwei ha kitei ki

snem. Ka la iapynbeit ruh bad ka Sorkar Assam ban ia ioh bynta na ki jingmih na ki Taxes on Vehicle bad na ki Mineral. Ka la iapynbeit ruh ba ka Sorkar Assam kan allot ia ki Development Scheme na ka bynta ki Iing Skul, Madan ialehkai, ki surok ha ka District, ki lynti ia id kjat (Footpath), ki Umdih ha ki shnong bad kiwei de ha ka Plan Budget jong ka State Assam bad ruh ban pynmang tyngka na ka bynta ban plie ia ki skul Primary ia kiba ka Executive Committee ka la pynmih naduh u snem 1956.

### ***Ki Election (1957)***

Ka Executive Committee ka la pdiang ia ka jingdawa paitbah ba yn pynduh noh ia ka jingdon jong ki Nominated Member bad hadien ka jingpan jingmut na ki Nongsynshar bad ki paitbah jong ka Ri Khasi-Jaiñtia, ka la thaw ia baroh 24 tylli ki Constituency ha ka snem 1957 ban jied paitbah ne ban pynlong ia ki ki Elected Seat.

Namar ka jinglyngkot ka por ban pynkhreh bad pynbeit (delimit) ia kitei ki constituency, bad ruh ba ka jingkut jong ka jingim ka District Council ka long ha u bnai slap, kata, ha u bnai June, 1957, ka la ai jingmut sha u Lat ka Jylla ban pynjlan ia ka jingim ka District Council haduh ka 31 tarik u December, 1957.

Kumta, ia ki Election sha ka Dorbar Thaw-Aiñ thymmai jong ka District Council la pynlong ha u

December, 1957, bad ka Executive Committee kaba thymmai hapoh ka jingialam jong u Bah B.M. Pugh kaba kynthup ruh ia u Bah Henry Cotton bad u Bah Theodore Cajee kum ki Executive Member ka la shimti ia ka jingsynshar ha u January, 1958.

## ***Ki Dorbar Hima Khasi Hadien Ka Jinglailtuid Ka Ri India***

Ki Hima Khasi ha ka juk synshar u Phareng ki dei ki Semi-Independent State ia kaba la iateh soskular ha ki Agreement hapdeng jong ki bad ka East India Company katkum ki jingiateh Soskular hapoh ka Acheitson's Treaties. Nalor ki Khasi State, ki don ruh ki Ilaka Sorkar (British Sirdarship).

Ha katei ka por, ki Hima Khasi ki bat ha ki ia kiba bun ki bor synshar (Autonomous Administration), katba ia ki Ilaka Sorkar la synshar beit da ka Sorkar Phareng lyngba ki Ophisar jong ka. Ki Khasi State lane ki Dorbar Hima Khasi ki hap beit hapoh ka jingpeit jong u nongmihkhmat ka Sorkar Bilat (Crown Representative) uba la pyniaid ia ka jingsynshar halor ki Hima Khasi lyngba u Political Agent.

Hadien ka jinglailtuid ka ri India na ka kti synshar ki Phareng ha ka 15 tarik u August, 1947, ia ki Hima Khasi la pyniaid shipor da ka Khasi States Federation kaba don u Secretary (Late Jormanik Syiem) uba la resaiñ noh na ka kam SDC

bad la thung ruh ia u Bah A.S. Khongphai (Senior Advocate) kum u Judge hapoh ka jingsynshar shipor ka Federation of Khasi States. Ka ophis jong ka Federation ka don ha Riatsamthiah, Shillong. Kane ka jingsynshar shipor jong ka Khasi States Federation ka la kut noh ha ka 26 tarik u January, 1950 hadien ka jingpynjari ia ka Riti Synshar (Constitution) jong ka ri India.

### ***Kumno Ki Khasi State Ki Hap Hapoh Ka Ri India***

Shuwa ba ka Sorkar Phareng kan aiti ia ka jingsynshar laitluid ia ka ri India, ka la tyrwa ia baroh ki Semi –Independent State kynthup ia ka Manipur, Tripura bad Khasi States ba kin jied (opt) shano ki kwah ban pyniasnoh ialade la sha ka ri India ne sha ka ri Pakistan. Ki Khasi State lyngba ka Khasi States Federation ryngkat bad kiwei ki Hima kiba don ha kylleng ka ri India ki la pyniasnoh ialade hapoh ka Map jong ka ri India. Kumta, baroh kitei ki State ki dei ban soi ia ka Instrument of Accession. U Deputy Prime Minister, u Sardar Vallabhai Patel uba long ruh u Home Minister jong ka ri India u la leit da lade sha ki Hima Trai Ri ka ri India kum ka Hyderabad, Mysore bad kiwei kiwei kynthup ia ki Khasi State ha kaba u la pynsoi ia ka Instrument of Accession. Une u Deputy Prime Minister u la wan poi ha Shillong ha ka snem 1948 ha kaba u la iashem ia baroh ki nongsynshar jong

ki Hima Khasi ryngkat bad ki 'riewkhmat jong ka Khasi States Federation ha iing jong u Lat (Governor) ka Assam, u Sir Akbar Hydari. Ki Nongsynshar kiba bat ia ki jingsynshar Hima ha kato ka por ki la iasoi ia katei ka Instrument of Accession laitnoh u Syiem Nongstoiñ bad u Syiem ka Hima Rambrai. Baroh arngut kitei ki Syiem ki la soi ia katei ka Soksular (Instrument of Accession) ha Rambrai bad ha Nongstoiñ hadien ba ka Sorkar ka la phah ia u Deputy Commissioner ryngkat bad ki pulit kieng atiar (Armed Police). Dei ha kane ka por hadien ba u Syiem Nongstoiñ u la soi ia katei ka Soksular, u Syiem Khynnah, Wycliffe Syiem u la mih noh na la ka ri bad leit buhai shnong noh sha East Pakistan kaba ngi tip mynta kum ka Bangladesh

Ia kane ka Instrument of Accession la soi bad pdiang da ki Hima Khasi kumba la leh da kiwei pat ki Semi-Independent State ka ri India.

Ha ka 26 tarik u January, 1950 la pynjari ia ka Riti Synshar (Constitution of India) kaba la pynskhem ia ka Ri India kum ka Ri Synshar Paidbah (Republic). Ha kane ka Riti Synshar, la tynsat ia ka Sixth Schedule ha kaba la buh beit buh ryntih ia ki jingsynshar lade (Autonomy) na ka bynta ki 5 tylli ki District Ri Lum ka jylla Assam, ka Naga Hills (Nagaland), Lushai Hills (Mizoram), ka United Mikir & North Cachar Hills, ka Garo Hills bad ka United Khasi & Jaintia Hills.

Katba ki paidbah ka Ri Lum Naga hapoh ka jingialam u A.Z. Phizo ki la kyntait ban don hapoh ka ri India, kiwei pat ki paidbah riew lum ki la pdiang bad ki la iashim bynta ha ki election jied paibah sha ki Dorbar Autonomous District Council ha kaba sdang jong ka snem 1952, ha kajuh ka sngi ba la pynlong ia ki elekshon kiba nyngkong sha ka Dorbar Bah Parliament ka ri India bad sha ki Dorbar Thaw-Aiñ ki jylla ka ri India ba laitulid.

### ***Ki Hima Khasi Hapoh Ka Jingsynshar Ka District Council***

Ia ka United Khasi & Jaiñtia Hills Autonomous District Council la plie (inaugurated) ha ka 27 tarik u June, 1952 da u Lat ka Jylla Assam ha Dinam Hall, Jaiaw, Shillong. Ha kane ka sngi la pynsmai ia baroh ki MDC kiba don ha kato ka sngi bad khyndiat ngut kiwei pat la pynsmai hadien. Naduh kane ka por, ki Dorbar Hima Khasi ki la hap hapoh ka bor synshar jong ka Dorbar United Khasi & Jaiñtia Hills Autonomous District Council. Kane ka jingkylla jong ka dur synshar paibah ka la wallam bun ki jingsngewthuh bakla halor ka jingiadei hapdeng ki Dorbar Hima Khasi bad ka Dorbar District Council. Ki la don ruh ki jingialeh pyrshah ha ki katto katne tylli ki Hima ia ki hukum ba la pynmih da ka Dorbar District Council ha kaba la pyntreikam da ka Executive Committee jong ka kaba bat bad pyniaid ia ka jingsynshar kum ka Sorkar.

Na ka daw ba ki jingsynshar kiba la don shuwa ka jingsynshar District Council kiba bat ia ki bor synshar kum ki Dorbar Shnong, ki Dorbar Raid, ki Dorbar Syiem bad ki Dorbar Hima ki iapher na ki jingsynshar jong ki Ilaka Sorkar bad ka Jain̄tia Hills, ka District Council ka la ithuh (recognized) ia baroh ki dustur –riti kiba la don lypa mynshuwa tad haduh ka jingpynbeit bad ka jingthaw ia ki aiñ pyniaid na kawei ka por sha kawei pat. Katba ha ka jingsynshar ia ka Jain̄tia Hills bad ia ki Ilaka Sorkar, la pyniaid kumba ki long. Ka District Council ka la pynmih ki hukum kyrpang ha ki jingiadei bad ka jingsynshar Dorbar Hima Khasi kum ha ka jingiadei ia ka jingpyniaid ia ki khyndew ki shyiap, ia ki khlaw ki btaṗ, ki iew ki hat bad kiwei kiwei ha kata ka dur ba kan ym don ka jingktah ia ki hok, ki riti bad ki dustur kiba la don. Kiba bun ki aiñ ba la pynmih da ka District Council ki long ha ka snem 1953 ha ka por jong ka Executive Committee u Bah Hobel Rynjah.

Ka District Council, ha katei ka snem, ka la pynmih ruh ia ka aiñ bishar (Administration of Justice Rules, 1953) ha kaba la seng ia ki lingbishar District Council (District Council Courts) kaba kynthup ia ka Iing Kashari hapoh u Judge, u Bah Cromoline Lyngdoh uba la bat ia ka Kashari jong u District & Session Judge ha Dibrugarh shuwa ba un shimti ia kane ka kam bad ruh ia ki Kashari (Subordinate District Council Courts) jong u Magistrate ha Shillong bad ha Jowai. Ki Magistrate kiba la thung ha kata ka por ki long u Bah Osiris

Lyngdoh, EAC ha Shillong bad u Bah Carlie Thomas, EAC ha Jowai ia kiba la shim kylliang na ka ling Kashari u Deputy Commissioner, Shillong.

Katei ka aiñ ka la pynbeit ruh ba ki jingbishar ia ki Hima Dorbar Khasi kin hap hapoh ki Iing Dorbar jong ki Syiem ne Lyngdoh kumba ki ju long, kata, ki Hima ba kham heh kum ka Hima Myllem, Hima Nongkrem, Hima Sohra, Hima Nongkhlaw, Hima Nongstoiñ bad Hima Maharam ia kiba la tip kum ki Subordinate Courts ha kaba ki bat ia ka bor bishar jong u Magistrate kat kum ki bor ba u Lat ka Jylla u pynkup ha ki. Lait noh ka Hima Myllem kaba la ioh ban bat ia ka bor jong u First Class Magistrate, ia kiwei la buh hapoh ka bor u Second Class Magistrate. Nalor kitei, kiwei pat ki Dorbar bishar jong ki hima kiba kham rit la pynkup da ka bor u Third Class Magistrate.

Nalor ki bor bishar ba la pynkup ia kitei ki Dorbar ba la kdew haneng, katei ka aiñ ka la pynkup ruh ia ki Hima kiba rit bad ki Ilaka hapoh ka bor bishar jong ka Village Court. Kane ka kynthup ruh ia ki Doloiship kiba don ha Jaiñtia Hills.

### ***Ka Rukom Jied Ia Ki Nongsynshar***

Hadien ba ka Sorkar Phareng ka la shimti ia ka jingsynshar ki Hima Khasi, ka la pyniaid ia ki dustur jied nongsynshar, kata, ia ki Syiem, ki Lyngdoh bad kiwei kat kum ki dustur ha kaba ia ki nongsynshar la jied paitbah da ki shynrang ki ban ym duna ia ka



jinglong rangbah. Hynrei hadien ba u Political Agent u la shem ba kane ka dustur jied paitbah ia u nongsynshar ka la pynmih bun ki jingkulmar, jingiapyniap briew bad jingiashun, kumta ka Sorkar ka la thung ia u Colonel Harbert ban leit jurip ia ki Hima kylleng ka ri ha kaba u la ai jingmut ba ia kane ka dustur jied paitbah dei ban bujli noh da ki kynhun nongjied (Electoral Colleges) ia kaba ka Sorkar ha kato ka por ka la mynjur bad pynskhem. Kum ka nuksa, ia u Syiem Ron Sing ka Hima Myllem la jied paitbah bad ha ka por ka jingsynshar une u Syiem, u Political Agent u la pynmih ka hukum ba hadien u Syiem Ron Sing, ia u nongmih bujli jong u, yn jied da ka kynhun ki San Bakhraw, ki Ar Basan bad ki Nongjied (Electors) katkum ka report jong u Colonel Harbert ha ka snem 1903. Ia u nongbteng jong u, u Syiem Kmuiñ, la jied da katei ka kynhun bad kumjuh ruh ia kiwei ki Syiem Myllem kiba hadien jong u.

Kumjuh ruh, ia kiwei ki nongsynshar kum ki Syiem bad Lyngdoh la jied da kitei ki kynhun nongjied (Electoral Colleges) kumba la ai jingmut hapoh katei ka Report jong u Colonel Harbert.

### ***Ka Jinglut Jingsep Ki Hima Ha Ka Synshar – Khadar***

Ka District Council ka la pynbeit ba ia ki jingsynshar bad bishar jong ki Hima yn pynlut bad kit khlieh hi da ki jingmih napoh ki Hima bad ba

kawei na ki phra bynta yn ai sha ka District Council manla ka snem. Hynrei, la shem ba jan baroh ki Dorbar Hima kim lah satia ban pyndap ia ka lut ka sep ha ka jingiadei bad ki jingsynshar-khadar kynthup ia ki kam bishar jong ka Hima.

Dei tang ka Hima Myllem kaba don ki jingmih kiba bun khamtam na ka khrong ka dan jong ki iew ki hat bad kiwei ki jingmih kiba bun khamtam na ka Iewduh (Bara Bazar) kaba don ha Shillong.

Ka Executive Committee jong ka District Council ka la sospon ia ki nongsynshar na ka daw ba kim ju lah ban ai jingkheih kaba biang ia ki jingmih bad jingpynlut jong ki Hima nalog kiwei de ki daw. Ka Executive Committee ka la ju thung da ki Acting-Syiem ban bat shipor ia ka jingsynshar man ba la sospon ia uno uno u nongsynshar. Kaba phylla ka long ba ka District Council ka la ju thung Acting Syiem wat ia u bym dei na ka jait Syiem ne Lyngdoh kaba don ka hok ban long nongsynshar. Kane ka jingsospon ka la pynmih ia bun ki mukotduma ha ka High Court bad teng teng ka Appeal ka ju poi shaduh ka Dorbar Kashari Bah (Supreme Court) ka ri India.

### ***Ki Daw Jong Ka Jingiakhih Paidbah***

Watla ka long kaba shisha ba ki jingbymshongsuk jong ki jingsynshar ha ki Dorbar Hima ki long ha ka jingbymdon ka Dur-Synshar kaba shai bad thikna ha ki jingpyntrei kam jong ka District Council

kyrpang ha ka jingiadei bad ki Dorbar, pynban ka daw kaba shisha ka long ka jingsahdien jong u khun u hajar kiba hap hapoh ka Jylli Synshar jong ki Hima bad Ilaka.

Ka jingbymdon ka buit trei kam (policy) jong ka Sorkar Jylla ha ka jingiadei bad ki kam pynroi ri (Development Schemes/Projects) bad ka jingsynshar District Council ka la pynmih bun ka jingbymshongsuk hapdeng u paid uba bun uba lang uba iai sahdien haduh palat ia ka sanphew snem ka jingsynshar laitluid ka ri India.

Ka Sorkar India ka la pynmih bun ki scheme pynroi paidbah khamtam ha ki jaka nongkyndong ia kaba ki Jylla ka ri India ki la pyntreikam lyngba ki Dorbar Shnong (Gaon Panchayat), ki Dorbar Raid (Muhkma Parishad) bad ki Dorbar ba kham haneng ba la tip kum ki Anchali Panchayat. Ia kine ki Dorbar la ju jied paitbah man la ka san snem ha kaba ia baroh ki kam pynroi ri la pynbeit ba kin iaid lyngba kitei ki Dorbar.

Ka Jylla Assam kaba don ki Autonomous Council kum ka Karbi Anglong, North Cachar Hills, Bodo Land Council bad kiwei ka la ai bor ia kiba bun ki kam pynroi ri ha ki Dorbar Shnong bad kiwei de ki kynhun ha kaba kitei ki Council ruh ki iadon kti lang.

Ki don ruh ki jingsynshar Panchayati Raj ha kiwei pat ki bynta jong ka Jylla Assam ia kiba la jied paitbah. Ha kine ki Dorbar la pyniaid ia ki kam pynroi ri da kaba buh ia ki Ophisar bad ki nongtrei Sorkar ban trei ha ki Ophis jong kitei ki Dorbar.

Ka Sorkar Meghalaya ka la thung ruh ia ka S.K. Dutta Commission ban tohkit bad ai jingmut sha ka Sorkar ha ka jingiadei bad ki jingsynshar District Council khamtam ha kaba wad ki lad ki lynti kumno ban pyniaid ia ki kam pynroi ri hapoh u pud u sam jong ki lai tylli ki District Council. Kane ka Commission ka la pyndep ia la ka kam bad ka la ai ia la ka jong ka kaiphod (Report) ryngkat bad ki jingai jingmut ha ka jingpyntrei kam ia ki District Council hynrei haduh mynta ka Sorkar jylla kam pat lah satia ban pyntrei kam ia ki.

Kawei ka daw kaba kongsan ka long ba bun ki MLA bad ki Minister ka jylla ki mih khmat ruh ha ki District Council. Kane ka la pynsting ia ka jingmut jingpyrkhat jong ki ha ka jingiadei bad ki kam synshar jong ka District Council. Kane ka jingai lad ia ki MP bad ki MLA ban long MDC, ka la long hadien ba ki saw tylli ki District Council, kata ka Garo Hills, ka United Khasi-Jaintia Hills, ka Lushai Hills (Mizoram) bad ka United Mikir (Karbi Anglong) North Cachar Hills ki la ai ka Memorandum ha ka snem 1953 sha u Prime Minister Jawaharlal Nehru lyngba ka Sorkar Assam ba ia ka Disqualification Clause hapoh ka Representation of People's Act, 1951 yn weng noh shipor na ka daw ka jingduna ki nongialam ha kitei ki District Council Ri Lum. Hynrei mynta la bun bah ki nongialam ki la mih ha ki madan ialeh election bad ka la dei ka por ba ka Sorkar jylla kan shim khia ia kane ka kam ban pynbeit biang ia ka Representation of People's Act ban shah ba uwei u briew un mihkhmat tang ha ka

Dorbar District Council ne Dorbar Jylla ne Dorbar Parliament.

Kane ka long kaba donkam ba ki nongmih khmat ha ki Dorbar District Council kin ioh ban pynleit jingmut ha ka jingiadei bad ki kam pynroi ri khamtam ha ki Hima Khasi kiba dang sahdien shibun eh.

### ***Ka Hok Halor Ka Khyndew Ka Shyiap Bad Ki Dustur Ki Riti***

1. Wat la u Syiem bad ka Dorbar Hima kim don ka hok longtraï halor ka khyndew ka shyiap, pynban ki don ka jingkitkhlieh ban peit bad bishar halor ki khyndew Ri Raid ha kaba ki Syiem Raid, ki Lyngdoh bad kiwei kiba dei peit halor ki Ri Raid ki dei ban pyniaid katkum ki dustur ki riti kiba pher na ki Ri Kynti. Katkum ki dustur ki riti ym don ba lah ban kam hok halor ka khyndew ka shyiap jong ka Raid, lait tangba uno uno u khun u hajar Khasi u lah ban skud ia kano kano ka bynta jong ka Raid bad ba u lah ban pyndonkam ia ka ha ka rep ka riang kaba u dei ban ker bad sumar. Hynrei, lada u iehnoh ia ka laisnem lynter, katei ka jaka jong u ka leit phai biang sha ka Raid.

Ka jingkylli kaba don hakhmat ka ri bad u paidbah ka long, “Kumno kiba bun ki Ri-Raid ki la kylla Ri-Kynti mynta bad ha kano ka dur ba kito kiba bat ia ka bor synshar halor kito ki Raid ki lah ban ai Pata?” Bun na kitei ki Ri Raid la die pateng da kito kiba bat Pata sha kiwei pat ne sha ka Sorkar.

Ki Dorbar Hima kiba don ki Ri Raid kiba kylla Ri Kynti mynta ki don ka jingkitkhlieh ban pynshai mynno bad kumno kitei ki Ri Raid ki kylla Ri Kynti.

2. Ka Hok hiar Pateng ha ki Ri Kynti :- Ka long kaba shisha ba ki hok bad ki dustur riti jong ka jingioh bad hiarpateng ki khun ki pyrsa ki iapher na kawei ka Hima sha kawei pat. Ki don ki hima ha kiba ia ki hok halor ka khyndew ka shyiap la ju pyniabynta hapteng ki khun shynrang bad kynthei, don pat ruh ki hima ha kaba ka jingioh ban hiar pateng halor ka khyndew ka shyiap bad ka jingdon jing-em la pyniabynta tang hapteng ki khun kynthei ha kaba ka bynta kaba khambun bad ka iingkmie ka hiar pateng sha ka Khatduh.

Namar ba ki dustur-riti ha kane ka phang kim don ha ka jingthoh-jingtar, la mih bun ki mukotduma ha kaba ki rai jong ki Kashari ki iapher kawei na kawei pat. Kumta, la mih ruh bun ki apil wat haduh ka High Court.

Ka High Court Bench kaba kynthup ia ki nongbishar (Judges) ka la pynmih ia ka rai ha ka mukotduma kaba dangshen ha ka jingiaknieh hok hapteng ka Khatduh bad ki Longkñi kiba dei peit halor ka khyndew ka shyiap jong ka iing Kur Kharkongor ha Langkyrding (Pynthorumkhrah) ha kaba katei ka Bench ka la rai katkum ka Kot 'Note on Khasi Laws' ba la thoh bad pynmih da u K. Cantlie, ICS. Kane ka long kaba nyngkong ha kaba katei ka High Court ka la pynmih bad ithuh ia ki dustur bad riti hiar bad iohpateng hapoh ki kyndon jong katei ka kot ba la kdew haneng.

## ***Ka Jingdawa Ban Ai Ka Jingsynshar Lade Ha Ki Hima Khasi***

Ha kine ki khyndiat snem ba la dep, ka la mih ka jingdawa ban ithuh noh ia ki Dorbar Hima Khasi da ka Riti Synshar ka ri India shabar na ka District Council. Ha ka jingiadei bad kane ka jingdawa, ka jingkylli ka mih ba lada weng noh ia ka Sixth Schedule, ki hima ki dang lah mo ban sah? Kane ka long namar hadien ka jingpynjari ia ka Riti Synshar ka Ri India, la aiti ia ka jingsynshar lade ki riewlum Assam ha kato ka por ha ki District Council katkum katei ka Sixth Schedule.

## ***Ka Dur Synshar Paibah Ki Hima Khasi***

Ia ki nongsynshar ki Hima Khasi la jied da ki nongmihkhmat jong ki katto katne tylli ki Kur ne ki Jait bad dei kine kiba shong Dorbar ha ki Dorbar Syiem ne Dorbar Lyngdoh kiba pyniaid ia ka synshar khadar bad ka jingbishar ha la ki jong ki jong ki Hima. La kine ki jingsynshar kiba dang sah katkum ki dustur ki riti synshar ki long mo ki jingbishar paidbah ha kaba bun u khun u hajar um iadon kti eiei la ha ka jingjied ia ki nongsynshar lane ha ka jingsynshar ne bishar katkum ka dur synshar paibah (Democracy) jong ka juk mynta jong ka Ri India salonsar.











Elephant Falls



Kshaid Nohsngi Thiang



Behdienkhlam



Nartiang Monolith



Umiam Lake



Umiam River



Umngot River



Ka Shad Suk Mynsiem



Kyllang Rock

## ***Ki Jingkylla Synshar Kiba Ktah ia ka ri Khasi-Jaiñtia***

### **Ka Eastern India Tribal Union**

Ka long kaba donkam ban ai lyngkot ia ka Histori ki jingkylla synshar na kawei ha por sha kawei pat ha ka jylla Assam kiba ktah ia ka jaitbynriew Khasi-Jaintia.

Hadien bun ki jingbymshongsuk bad jingiakhil paidbah ha ki rilum, kiba hap hapoh ka kylla Assam, ki nongialam riwulum bad ki nongmihkhmat paidbah ki la iashem ha Tura ha kaba ki la seng ia ka Kynhun Eastern India Tribal Union (EITU) ha kaba la jied President ia u bah B.M. Pugh bad General Secretary ia u bah B.B. Lyngdoh. Watla katei ka kynhun ka kdup ia baroh ki riwulum kane ka thain, kiba ia shim bynta ki long ka District Garo Hills, Khasi-Jaintia Hills bad Mizoram.

Ka EITU ka la ialeh election ha ka snem 1957 halor ka Ishu dawa jylla ri lum shabar ka Assam. Ha kane ka elekshon, ka EITU ka la jop la jan baroh ki MLA na Mizoram, Khasi-jaintia Hills bad Garo Hills.

Ha kaba sdang jong ka snem 1958 ha kaba la jied Chief Minister ka Assam ia u Mr. B.P. Chaliya, ka kynhun ki MLA EITU ba la tip hadien kum ka Tribal Union kila pyniasoh ialadé kum ki dkhot jong ka Assam. Congress Legislative Party ha kaba la pynrung Cabinet Minister ia u Captain W.A. Sangma, Deputy Minister ia u Bah Lursing Khyrim bad Parliamentary Secretary ia u Mr. Lalmuia.

Kumta ka jingiakhiih dawa Hill State ka la sangeh.

Kane kam neh slem, namar ha ka snem 1960, ka Dorbar Thaw-Aiñ Assam ka la pynrung ia ka Aiñ ban ithuh ia ka ktien Assamese kum ka ktien Sorkar. Kane ka la pynkhih win ia baroh ki seng ha ri-lum kynthup ia ki District Congress Committee. Kine ki seng bad kynhun sain pyrthei kila ia seng ia ka kynhun ba la khot Ka All Party Hill Leaders Conference (APHLC) ha kaba la jied ia u Captain W.A. Sangma kum u President bad Bah Stanley Nichols Roy kum u General Secretary ha ka jingialang jong ka Conference kaba nyngkong eh ha ka Bangla "Goodwood", ka iing shong u Captain W.A. Sangma kum u Minister ka Tribal Affairs Department (TAD). Kane ka jingialang ka la rai ba lada ym pynsangeh ia katei ka Aiñ, un sdang ia ka jingiakhiih dawa jylla la ka jong shabar ka Assam.

Namarba ka Assam kam sngap ia katei ka jingdawa, ka APHLC ka la pynlong ia ka Conference kaba ar ha Halflong ha kaba la rai tylli ban dawa noh la ka jong ka jylla shabar ka Assam.

Haba ka Delegation jong katei ka Conference ka la iashem ia u Prime Minister Nehru ha New Delhi, u Prime Minister u la tyrwa ia ka jingsynshar ka ban pynlong kyrpang ia ka Dorbar Thaw-Aiñ lade hi ki MLA riwulum bad ha ka juh ka por ba kin iashim bynta ruh ha ka Dorbar Thaw-Aiñ ka Assam ka ba la ai kyrteng ia ka, ka Scottish Pattern of Administration. Ia kane la kyntait da ka APHLC ha kaba ka la jop la jan baroh ki MLA na ri Khasi-

Jaiñtia bad Garo kynthup ia ka Mizo Union kaba la ia synrop bad ka ha ka General Election, 1962.

Ka jingialeh dawa Hill State ka la nang jur. Ha ka snem 1969, ka Prime Minister Indira Gandhi ka la tyrwa ban ai ia ka jingsynshar Autonomous State hapoh ka jylla Assam. Ia kane ka APHLC ka la pdiang bad la pynlong ia ka Dorbar Thaw-Aiñ Autonomous State na ka bynta ka ri Khasi-Jaintia bad Garo Hills ha ka snem 1970 ha kaba la thung ia ki MLA da u Governor ka Assam kaba kynthup ia ki 30 ngut ki MLA. Ia kane ka dur synshar la pyrshah jur da ka kynthun HSPDP bad PDIC kiba pra na ka kynthun APHLC. Kumta, ka Prime Minister Indira Gandhi ka la wallam ia ka Bill ban thaw jylla Meghalaya kynthup ia ka Tripura bad Manipur kum ki jylla pura lait noh ka Nagaland kaba la ioh ia la ka jong ka jylla pura naduh ka snem 1963. Ka District Mikir North Cachar Hills ka la rai ban sah hapoh Assam bad ia ka Mizoram bad Arunachal la kyntiew kyrdan sha ki Union Territories, kiba hadien katto katne snem ki ruh ki la ioh la ki jong ki jylla pura.

### ***Ka Jaiñtia Hills Autonomous District Council***

Ka la don ka jingbymshong suk jong u khun u hajar ha ki lum Jaiñtia ban sah hapoh kawei ka jingsynshar District Council (Ka United Khasi-Jaiñtia Hills Autonomous District Council). Kumta,



ha ka snem 1956 la seng ia ka kynhun kaba la tip kum ka kynhun dawa District Council la ka jong ia ka Jaiñtia Hills. Ia kane ka seng la ialam da u Bah Kistobin Rymbai, MLA & MDC kum u President bad la thang Convener ia u Bah Humphrey Hadem, MDC. Kane ka kynhun hadien ka rai jong ka jingialang paidbah ha madan. Iawmusiang ha ka nongbah Jowai ka la ai ia ka Memorandum dawa District Council la ka jong ha u Governor bad u Chief Minister ka Assam. Ki la phah ruh ia katei ka Memorandum sha u Prime Minister Nehru lyngba ka Sorkar Assam. Ka Sorkar Assam ka la thung ia ka Commission ha ka snem 1959 ban leit jurip bad wad jingtip bñiah halor kiba bun ki Mat Dawa ba la ai ha katei ka Memorandum. Kane ka Commission hadien ba ka la pyndep ia la ka kam, ka la ai jingmut ba ka jingdawa ka don ki nongrim kiba khelaiñ kum ha ka liang ka jingiapher ka dur synshar jong ki Doloï bad ki Dorbar Hima Syiem bad ki dustur-riti bat hok ia ka khyndew ka shyiap bad kiwei de ki daw ba la kynthup ha katei ka jingai jingmut (recommendation) jong katei ka Commission. Ka Sorkar ka la ibit ban phiah ia ka United Khasi-Jaiñtia Hills Autonomous District Council ha ki arbynta, kawei ka long na ka bynta ka Jaiñtia Hills bad kawei pat na ka bynta ka Khasi Hills. Ia katei ka rai la pynjari ha ka snem 1964 katkum ki bor ba la pynkup ha ka Sixth Schedule jong ka Constitution ka ri India. Kumta ka jylla Meghalaya ka kynthup ia kitei ki artylli ki district Council bad ka Garo Hills Autonomous District Council.

Ka ri Khasi-Jaiñtia ka la poi biang sha kajuh ka thymmei synshar ha kaba la pyniakhlad ia u pud u sam ka Hima-Jaiñtia bad ka Hima Shyllong hadien kawei ka jingsynshar hapoh ka Hima Madur-Maskut.

Ia kane ka kot histori lyngkot jong ka ri Khasi-Jaiñtia bad ruh ha ka jingiadei bad ki jylla bamarjan la pynmih da u Nongthoh ha ka dur kaba lyngkot ia kaba la khmih lynti ba kiwei pat ki skolar ba ka ri bad ka jaitbynriew ka pynmih ki sa nang bud dien bad ai jingtip kaba kham janai na ka bynta ba ki khun ki hajar ka bri u Hynñiewtrep kin tip ia la ka jong ka thymmei long brieu man brieu.








Figure 1: Bormanik Syiem II

U la long u Chairman jong ki bun tylli ki Government Committee haduh ba la jied ia u sha ka Parliament (Rajya Sabha) ha ka snem 1984 haduh 1990.

U la long u Proprietor bad Editor ia u 'Pyрман', Ka kot Khubor Khasi shisien shi taiew kaba nyngkong.

U la thoh bad pynmih ia ki artylli ki Kot Khasi, (i) 'Ki Lad lada Bad Pynsan lalade' & (ii) 'Ka Jingrong Noh' nalog ki laitylli ki kot ha ka ktien Phareng kata. shaphang 'U Tirot Sing' (1990), 'U Kiang Nangbah' (1993), bad 'U Bormanik Syiem II' (1994). U la thoh ruh ia ki article ba la shon ha ki kotkhubor nalog kito kiba la pynmih dang shen ha ki Souvenir - *Golden Jubilee Khasi Hills Autonomous District Council*, Souvenir - *Ka Silver Jubilee Lummaubah Sports and Cultural Club* ha ka ktien Khasi bad artylli ki article ha ka ktien Phareng ia kiba la pynmih ha ka 'Maitshaphrang' jong ka K.S.U bad ka *Journal* jong ka Department of Arts and Culture, Meghalaya.

"Ngin ieng tylli ban da ia ka Ri na ka thombor u khyllah jait"

Bormanik Syiem II

"Khamkor ka jinglap Syiem ha byndi ban ia ka Jingim u Syiem ha khet long-mraw"

Tirot Sing

"Lada ka khlieh jong nga ka phai sha Mihngi, ka Ri kan ioh pat ia la ka Jinglailtuid"

Kiang Nangbah